

17
CHINESE-JAPANESE COLLECTION
HARVARD COLLEGE LIBRARY
FROM HARVARD-YENCHING INSTITUTE

SEP 20 1932

T 5236 / 2928

三
六

文體明辨卷之二十

大明吳江徐師曾伯魯著

冊

按說文云册符命也字本作策案漢書云策者簡也漢制命令其一日策書長三尺短者半之其次一長一短兩編下附符書以命諸侯王三公亦以誅蓋而三公以罪免則一木兩行連書而賜之其長一尺當是之時唯用木簡故其字作策至于唐人遺下之制有六其一曰册字始作册蓋以金王為之說文所謂諸侯遺受于王也

文體明辯卷之二十

大明吳江徐師曾伯魯纂



冊

按說文云冊符命也字本作策蔡邕云策者簡也漢制命令其一曰策書長二尺短者半之其次一長一短兩編下附篆書以命諸侯王三公亦以誅謚而三公以罪免則一木兩行隸書而賜之其長一尺當是之時唯用木簡故其字作策至于唐人逮下之制有六其三曰冊字始作冊蓋以金玉爲之說文所謂諸侯進受于王象

其札一長一短中有二編之形者是也又按古者冊書施之臣下而已後世則郊祀祭享稱尊加謚寓哀之屬亦皆用之故其文漸繁今彙而辯之其目凡十有一一曰祝冊郊祀祭享用之二曰玉冊上尊號用之三曰立冊立帝立后立太子用之四曰封冊封諸王用之五曰哀冊遷梓宮及太子諸王大臣薨逝用之六曰贈冊贈號贈官用之七曰謚冊上謚賜謚用之八曰贈謚冊贈官并賜謚用之九曰祭冊賜大臣祭用之十曰賜冊報賜臣下用之十一曰免冊罷免

大臣用之 今制郊祀立后立儲封王封妃亦皆用冊而玉金銀銅之制各有等差蓋自古迄今王言之所不可闕者也今錄古作以垂式云
祝冊

郊祀昊天上帝冊文 宋王安石

伏以眷命作邦百年於此蒙休承福外內用寧施及冲人嗣膺歷服燎禋有典稱秩維時

郊祀皇地祇冊文 宋王安石

伏以大報于郊有典咸秩厥作成物配天同功合食泰壇義存一體猥以冲眇紹休前人潔承昭事

不敢不察

德宗吉謝昊天上帝冊文

唐陸贄

維貞元元年歲次乙丑十一月癸巳朔十一日癸卯嗣天子臣某敢昭告于昊天上帝顧惟寡昧不克明道丕膺眷命俾作神主常恐獲戾上下而播災於人兢兢業業夙夜祇畏居位五祀德馨蔑聞皇靈不歆是用大徹殷憂播蕩踰歷三時誠懼列祖之耿光墜而不耀側身思咎庶補將來上帝顧懷誘衷悔禍勦兇慝之凌暴雪神人之憤恥舊物

不改臣心載新茲乃九廟遺休兆人介福以臣之責其何解焉間屬寇虞朱泚久稽告謝今近郊甫定長至在辰謹以玉帛犧齊粢盛庶品冀憑禋燎式薦至誠太祖景皇帝配神作主尚饗

郊祀配帝太祖皇帝冊文

宋王安石

伏以命于帝廷肇造區夏掃除僭悖人以求寧陟配天郊實存舊典靈承圭薦其敢忘初

翼祖皇帝冊文

宗仁

宋歐陽脩

維嘉祐四年歲次己亥十月壬戌朔十二日癸酉

孝曾孫嗣皇帝臣某禎敢昭告于高祖翼祖簡恭
睿德皇帝伏以皇天眷命興德造邦始基之初實
自積累獲嗣丕烈敢忘翼勵孟冬吉月歲事既成
合祭以時舉茲禮典維是備物將以誠懇之心神
其歆之錫以多福謹以一元大武柔毛剛鬣采盛
薌合薌其嘉蔬嘉薦醴齊嚴恭備物式薦虔心高
祖妣簡穆皇后劉氏配尚饗

淑德皇后冊文

宗仁

宋歐陽脩

維嘉祐四年歲次己亥十月壬戌朔十二日癸酉
孝孫嗣皇帝臣某敢昭告于皇祖妣淑德皇后

氏伏以彤管有煒內德茂焉清廟載嚴合食為重
十月維吉備物有容威靈來臨昭穆序配薦以誠
潔神其顧思謹以一元大武柔毛剛鬣采盛薌合
薌其嘉蔬嘉薦醴齊嚴恭備物式薦虔心尚饗

德宗告謝肅宗廟文

唐陸贄

維貞元元年歲次乙丑十一月癸巳朔十一日癸
卯孝孫嗣皇帝臣某适敢昭告于皇祖考肅宗文
明武德大聖大宣皇帝皇祖妣章敬皇后吳氏臣
嗣服先業不克負荷人流於下事失其中奸魁乘
豐作亂京邑播遷之咎臣實自貽震驚宗祧曠時

乏祀外憂內愧若墜深泉當作淵唐避高祖諱改淵作泉勵已誓志期刑大恥實賴聖祖中興之業全育兆人澤深慶遠流福裔嗣故上天悔禍羣孽就誅非臣寡昧所能績服今祇率百辟見於廟廷謹以一元大武柔毛剛鬣明粢薌其嘉薦嘉醑齊備物潔誠聿申告謝尚饗

朝享景靈宮聖祖大帝冊文

宋王安石

伏以靈德在天實基皇命降依下土臨貺後人方以眇躬進承郊廟神遊所御獻享維時庶幾顧歆

永有蒙賴

朝享英宗皇帝冊文 宋王安石

伏以靈德美行實兆初潛神民所歆寶命自至祇紹考服循而弗改用謚土宇以詒冲人登祔新宮歷茲嘉月燎裡有舊裸享維時

玉冊

上應乾聖壽太上皇冊文

唐憲宗

維永貞二年歲次景當作丙唐世祖諱丙當作丙唐世祖諱景當作丙唐世祖諱戊正月景戌朔皇帝臣某稽首再拜奉冊言臣聞上聖玄

邈獨超乎希夷疆名之極猶存乎罔象豈足以表
無爲之德光不宰之功然稱謂所施簡冊攸著涵
泳道德感於精誠仰奉洪徽有以自竭伏惟太上
皇帝陛下道繼玄元業績皇極膺千載之休曆承
九聖之耿光昭宣化源發揚大號敦本示儉慶裕
格天恩翔春風仁育羣品而功成不處褰裳去之
付神器於冲人想汾陽以高蹈體堯之德與神同
符其動也天其靜也地巍巍事表無得而言顧茲
寡昧屬膺大寶懼忝傳歸之業莫申繼述之志夙
夜兢畏維懷永圖今天下幸安皆睿訓所被而未

極徽號孰報君親是以台臣庶官文武之列抗疏
於內方伯藩守億兆之衆同詞於外請因壽曆以
播鴻名臣不勝大願謹上尊號曰應乾聖壽太上
皇當三朝獻壽之辰應五紀啓元之始光膺徽稱
允協神休斯天下之慶也

上睿貞皇太后

代宗后
沈氏

尊號冊文

唐德宗

嗣皇帝臣适言恩莫重於顧復禮莫貴於徽號上
以展愛敬之道下以正春秋之義則祖宗之所稟
命臣子之所盡心尊尊親親此焉而在兩漢而下

帝王嗣位崇奉尊稱厥有舊章永維丕烈敢墜前
典臣适謹上尊號曰皇太后

上懿安皇太后憲宗后尊號冊文

唐穆宗

嗣皇帝臣恒再拜言伏以正坤元母天下符至德
以昇大號因景運而飾鴻徽煥乎前聞焯彼古訓
以極尊尊親親之義明因天事地之經有自來矣
伏維大行皇帝貴妃大虹敏慶霽月披祥導靈派
於昭回揖殊仁於氣母範圍百行表飭六宮粵在
中闈流宣陰教輔佐先聖勤勞庶工顧以冲眇遭

罹閔凶荷成命於守器之時奉寶圖於鑄鼎之日
哀纏易月痛鉅終天而四海無虞萬邦有截仰惟
顧復之德敢揚聖善之風謹上尊號曰皇太后

尊皇太后仁宗后冊文英宗

宋歐陽脩

維治平二年歲次乙巳十一月丁巳朔十有六日
壬申嗣皇帝臣某曙謹稽首再拜言曰臣聞昔者
明王之以孝治天下者非家至而日見也蓋有要
道焉推所以行於已者為天下率盡所以奉其親
者為天下先而四海靡然而至風矣恭維有宋受

命造邦百年四聖而小子獲承之以繼我仁考之
遺休餘烈方與羣公卿士夙夜以思勉其不逮庶
幾如我仁考付畀之意以申罔極欲報之心此固
慄慄祇懼不敢違寧者也顧眇末之質提攜鞠育
慈仁咻煦至千有成自我聖母嗣位之始哀迷在
疚而憂勞一作勤艱難一日萬務協和綏靖保佑扶
持功施邦家亦維我聖母永惟至恩大德無物可
稱是以稽參典禮率籲羣心合志一辭懇懇惓惓
不勝大願謹遣攝太尉具官臣韓琦司徒具官臣
胡宿奉玉冊金寶上尊號曰皇太后恭維皇太后

聖善明哲柔閒靜專粵自正位中宮內助先帝
陰禮脩而教行儉德著而下化遂及萬國先於正
家逮夫玉几受遺遭時多難勉徇勤請權同聽決
而明識遠慮動懷謙畏深鑒漢家母后之失訖不
踐於外朝及歸政冲人合於易之進退不失其正
之聖是維全節鉅美固已超出前古而垂法後世
宜乎盛烈播於聲詩尊名光於典冊維末小子獲
奉溫清嗚呼殫九州之富以爲養未足盡於孝心
享萬壽之福而無疆期永承於慈訓臣某誠懼誠
抃稽首再拜謹言

會昌上尊號玉冊文

武宗

唐李德裕

維會昌二年歲次壬戌四月乙丑朔十四日戊寅
攝太尉光祿大夫守司空兼門下侍郎同中書門
下平章事臣德裕銀青光祿大夫守尚書左僕射
兼中書侍郎同中書門下平章事臣珙姓崔銀青光
祿大夫守中書侍郎同中書門下平章事臣紳姓李
及文武百官金紫光祿大夫檢校司徒兼太子太
保臣僧孺姓牛等六千五百七十四人言臣聞羲皇
首太古之號成湯顯神武之稱我高祖皇王是憲

尊名若古貽厥丕訓為孝孫之法豈不善始善述
哉矧乃巨唐受命繼體承業理運將至大君以興
吳穹所以開至聖也曩者明兩未定帝華不協捨
亂傳聖深惟至公先后所以昭天命也亦猶堯舜
於唐侯文興於代邸神明之祚不其難哉伏維皇
帝陛下清明傳鬯光耿四海玄德真隣天休大賚
日角見表氣志如神爰初定命正心理物如辰居
其極而天下無邪矣由是昭德塞違尊賢遠佞禹
不自滿成不自康罔盤于田不邇于色自閨壺以
施王教由家道而刑國風去比周覈名實擢權綱

擇聖德脩舊典協誠質圻嘉壇款太一進正臣以
端治表禮故老以求讜言遠無蔽獄近無留命祈
玄祖而膏雨降祀靈岳而嘉穀登省刑罰而蓬勃
消發倉廩而蝨螟息去歲龍旂承祀大輅親郊捧
玉瓊而一獻光靈來格振金石而六變魄寶昭臨
然猶古訓是學緝熙于道天文炳煥雲漢其章温
恭敬遜承太任之教和樂愷悌洽戚藩之心德風
偃于羣黎威靈動乎絕域又以敬飡不逮於長樂
昭配未升於禰宮每懷嗣徽蒸蒸而慕所以奉若
慈訓對越兩儀因心立制未錫其教寬底劉之罪

興惻隱之仁迴霜收電爲之反禾及單于慕義景
附朔邊耀德戢兵謙臨是受至於備文物展國容
莫不先甲而布甘澤丁辰而廓陰翳和景宴温卿
讀曰 霽網緼斯所謂神祇之心應矣天人之際交
矣於是服冕之士戴鶡之倫暨藩衛邦伯黃髮鮐
背不謀而進曰陛下玄默天睟輝光日新大矣孝
熙四極爰臻誠宜玉版温潤鏤鴻明之德神寶焜
耀薦萬斯之年丕維大典不可辭也陛下猶謙退
固拒至于三四羣臣不已乃曰俞哉夫編履包含
之謂仁極深研幾之謂聖憲度著明之謂文蠻夷

震懾之謂武感而遂通之謂神無思不服之謂孝
臣等不勝大願謹奉玉寶上尊號曰仁聖文武至
神大孝皇帝伏維陛下乾健不息謙尊而光樂戒
其耽禽戒其荒壽乃侔於殷宗俗乃厚於成康貽
燕後昆受福無疆臣德裕等誠歡誠躍頓首謹言
立冊

策立安帝文

漢鄧太后

維延平年號元年秋八月癸丑皇太后曰咨長安
侯祐孝和皇帝懿德巍巍光于四海大行皇帝帝
不永天年朕惟侯孝章帝世嫡皇孫謙恭慈順在

孺而勤宜奉郊廟承統大業今以侯嗣孝和皇帝
後其審君漢國允執其中一人有慶萬民賴之皇
帝其勉之哉

冊肅宗皇帝文

宗

唐賈至

維天寶十五載歲次丙申 月戊子朔二十一日
戊申太上皇若曰咨爾元子某亨唯天爲大唯人
君則之順乃德故舜禹揖讓而履皇極嘒乃道故
丹朱商均不能保鴻業是以啓有惠迪而夏嗣焉
隋有亂紀而唐受焉五聖之御寓皆以勤儉兢業
日慎一日故能享祚長久垂慶無窮洎于六葉恭

位四海厭于勤倦緬慕汾陽將保靜願神思我烈
祖玄元之道是用命爾元子當位嗣統於戲爾有
忠孝之誠極于君父爾有友愛之義信于兄弟爾
有仁恕之行通于神明爾有戡難之才彰于兆庶
予懋乃懿德嘉乃神武天之曆數在爾躬汝惟推
誠禍亂將冀爾永清汝惟從諫宗社將冀爾復寧
佞言惟疵直言惟師任賢勿貳去邪勿疑民非后
孰治后非賢罔與守邦欽哉慎乃有泣無忝我祖
宗之不烈

立順宗皇帝冊文

唐德宗

維貞元二十一年歲次乙酉正月辛未朔二十三
日癸巳皇帝若曰於戲天下之大實維重器祖宗
之業允屬元良咨爾皇太子誦睿哲溫恭寬仁慈
惠文武之道秉自生知孝友之誠發於天性自膺
上嗣毓德春闈恪慎于厥躬祇勤于大訓必能誕
敷至化安勸庶邦朕寢疾彌留弗興弗寤是用命
爾繼統俾紹前烈宜陟元后永綏兆人其令中書
侍郎平章事高郢奉冊即皇帝位爾惟奉若天道
以康四海懋建皇極以熙庶功無忝我高祖太宗
之休命

立皇后何氏冊文

晉穆帝

維升平元年八月皇帝使使持節兼太保侍中太宰武陵王晞冊命故散騎侍郎何氏名女為皇后咨爾易本乾坤詩首閔睢王化之本寔由內輔是故皇英嬪虞帝道以光姪姒毋周胤嗣克崇皇后其祇勗厥德以肅承宗廟虔恭中饋盡敬婦道帥導六宮作軌儀於四海皇天無親維德是依可不慎歟唐開元禮冊文仍用此篇但改易本為易階昌敬婦導六之間並增于字又改軌儀為範儀餘並同

立皇后曹氏冊文

宋仁宗

皇帝若曰天地定位陰陽相成人道貫之以綱大倫后德配之以熙內治聖人有以端其本也故造舟之迎言乎備詩人有以美其化也故周南之風著乎始粵朕冲昧祇若丕構深惟承荷之重輔佐攸艱用簡納賢明慟於人神之望咨爾贈尚書令冀王配享太祖廟庭曹彬孫女維乃祖克有武力勤勞王家保勲不伐饗厥終慶教流後昆薰然慈和善祥憑積生此邦媛其漸漬醇醲發聞馨香所從來遠矣起居祖習不待姆師之訓風容矩度自為宗黨之憲長秋曠位陰教未序咨求訓範統正

六列宗公鼎臣誦言于朝願即嘉時聿申典禮朕以春秋之義必聚大國摯疇之家乃稱福耦謀及泰筮聘以穀圭維吉之從有命既集今遣使工部尚書同平章事李迪副使戶部侍郎叅知政事王隨持節冊命爾爲皇后欽哉夫維肅恭可以事上夫維謙裕可以接下恭而能約則驕弗至動而慎思則悔弗萌~~德~~乃后德脩乃嬪職奉承宗廟儀刑家國永綏無疆之祚不其韙歟

皇后冊文

神宗

宋王安石

熙寧二年歲次己酉四月丁酉朔二十六日壬

皇帝若曰自昔有天下必擇建厥配以承宗廟以御家邦肆朕受命奉循前烈考慎典冊以祈協于神民咨爾向氏懿柔淑恭舊有顯聞肇功維祖弼亮帝室流德之澤覃延後嗣是產碩媛比賢姜任越朕初載來嬪藩邸盥饋在中率禮無違以至嗣服祇承內事齋明夙夜罔有曠失宜崇位號表正宮庭今遣攝太尉推忠協謀同德佐理功臣樞密使光祿大夫檢校太傅行尚書刑部侍郎上柱國東平郡開國公食邑五千戶食實封一千戶呂公弼攝司徒朝散大夫右諫議大夫叅知政事護

軍太原郡開國侯食邑一千一百戶賜紫金魚袋
王珪持節冊命爾爲皇后夫維興王釐厥士女咸
自內始達于四海朕克勤人用弗怠朕克儉人用
弗奢朕克正人用無敢側頗僻爾勤相朕乃濟登
茲於戲匪初維 惟慎厥終爾忱念茲朕以永享
天祿爾亦豫有一疆之福豈不躋哉

立皇太子冊文

唐順宗

建儲貳者必歸於冢嗣固邦本者允屬於元良咨
爾元子廣陵王某名純是爲憲宗幼挺岐嶷長標洵淑佩
詩禮之明訓宣忠孝之弘規居維保和動必循道

識達刑政器合溫文愛敬奉於君親仁德聞於士
庶神祇龜筮罔不協從是用命爾爲皇太子於戲
維我烈祖之有天下也功格上帝祚流無窮光續
洪業逮予十葉虔恭寅畏日慎一日付爾以承祧
之重勵爾以主鬯之勤以貞萬國之心以揚三善
之德爾其尊師重傅親賢遠佞非禮勿踐非義勿
行對越天地之耿光丕承祖宗之休烈可不慎歟

冊新迴鶻即回也可汗文

唐白居易

維長慶元年歲次辛丑四月庚寅朔二十一日庚

成皇帝若曰唐有天下垂二百載列聖垂拱八荒
即叙舟車之所及日月之所照威綏仁董罔不嚮
化維北之氣積厚而靈靈發象生生為豪傑義信
武烈代為名王南西東方亦有君長較雄聞智莫
之與京國朝已來寢漬風澤或効功伐或申婚媾
同和協比以託于今今朕不德祇嗣大統推義布
信以初為常矧乎柔遠申恩睦鄰展禮茲惟舊典
垂自祖宗虔奉恭行安敢失墜咨爾九姓迴鶻君
登里羅羽錄沒密施句主錄毗伽可汗地生竒特
天賜勇智英姿所莅雄畧所加諸戎雜虜愛畏柔

服風靡山立清寧一方宜人有土受天百祿特推
代嗣實來告予曰予一人實鄰冊命是用遣使朝
議大夫檢校左散騎常侍兼少府監御史大夫雲
騎尉賜紫金魚袋裴通副使朝議大夫守少府少
監兼御史中丞襲魏國公食邑三千戶賜紫金魚
袋賈隣等持節備物冊為登里羅羽錄沒密施句
主錄毗伽可汗於戲善必有鄰德無不答此崇恩
禮則彼竭信誠克保大義永藩中夏昭昭天地實
聞斯言

冊迴鶻可汗加號文

穆宗

唐白居易

穆宗初立迴鶻固求婚許之以憲宗女太和公主下降故有此冊

維長慶元年歲次辛丑某月朔某日皇帝若曰北方之強代有君長作殿玄朔賓于皇唐粵我祖宗錫乃婚媾五聖六紀二邦一家此無北代之師彼無南牧之馬兵匣鋒刃使長子孫協德保和以至今日咨爾迴鶻君登里羅羽錄沒密施句主錄毗伽可汗義智忠肅武決勇健天之所授時而後生故東漸海夷西亘山狄惠寧威制鱗帖草偃聲有聞於天下氣無敵於荒外而能事大圖遠納忠貢

誠請仍舊姻誓嗣前好朕惟睦鄰是務柔遠為心既降和親之命遂申飾配之禮禮物大備寵章有加喜動陰山光增昴宿夫以迴鶻雄傑如彼慶榮若此雖自貴曰天驕子未稱其盛雖自尊曰天可汗未稱其美宜賜嘉號以大誇將來今遣使其官某副使其官某等持節加冊為信義勇智雄重貴壽天親可汗於戲釐降展親大德也進冊加號大名也宜乎思大德稱大名懋哉始終欽若唐之休命

封冊

封齊王策

漢武帝

維元狩六年四月乙巳皇帝使御史大夫湯張姓廟

立子闕為齊王曰烏呼小子闕受茲青社朕承天

序維稽古建爾國家封于東土世為漢藩輔烏呼

念哉共讀曰恭朕之詔維命不于常人之好德克明

顯光義之不圖俾君子怠使君子懈怠無歸附之者悉爾心允

執其中天祿永終厥有愆不臧迺于乃國而害

于爾躬烏呼保國又民可不敬與王其戒之

封燕王策

漢武帝

嗚呼小子旦受茲玄社建爾國家封于北土世為

漢藩輔嗚呼薰鬻氏虐老獸心以姦巧邊眚朕命

將率徂征厥罪萬夫長千夫長三十有二帥降旗

奔師薰鬻徙域北州以安安也悉爾心毋作怨毋作

桀古匪字德毋廢迺備非教士不得從徵王其戒之

封廣陵王策

漢武帝

嗚呼小子胥受茲赤社建爾國家封于南土世世

為漢藩輔古人有言曰大江之南五湖之間其人

輕心揚州保恃也疆三代要服不及以正正朔也烏呼

悉爾心祗祗兢兢迺順毋音通輕貌好逸毋

迺宵人惟法惟則書云臣不作福不作威靡有後

羞王其戒之

封魯王策

漢昭烈

小子永受茲青社朕承天序繼統大業遵脩稽古
建爾國家封于東土奄有龜蒙世為藩輔嗚呼恭
朕之詔維彼魯邦一變適道風化存焉人之好德
世茲懿美王其秉心率禮綏爾士民是饗是宜其
戒之哉

封梁王策

漢昭烈

小子理朕統承漢序祇順天命遵脩典秩建爾于
東為漢藩輔維彼梁土畿甸之邦民仰教化易聳

以禮往悉乃心懷保黎庶以永爾國王其敬之哉

以上
古體

德宗冊嘉誠公主文 唐陸贄

維貞元元年歲次乙丑六月甲子朔十二日乙亥
皇帝若曰王者以義睦宗親以禮敦風俗義之深
寔先於友愛禮之重莫大於婚姻故春秋書築館
之儀易象著歸妹之吉予是用祇考令典率由舊
章咨爾嘉誠公主孝友柔謙外和內敏公宮稟訓
四德備脩疏邑啓封命為公主徽章所被禮實宜
之今遣光祿大夫檢校司徒同平章事汧國公勉

持節冊命爾維欽哉下嫁諸侯諒維古制肅雍之
德見美詩人和可以克家敬可以行已奉若茲道
永孚于休懋敦王風勿墜先訓光膺盛典可不慎
歟

德宗冊蜀王妃文

唐陸贄

維建中二年十一月某日皇帝若曰夫茂建親戚
以敦族固本明慎選納以厚別蕃嗣寔人倫之始
王教之端也朕奉若謨訓允求淑哲賢必有象鍾
慶於令門姻不失親載光於戚里故某官駙馬都
尉田擇交第若干女生稟柔惠習知禮則容德純

備孝睦洽聞可以協美好述輔成樂善是用使其
官某持節冊命爲蜀王妃嗚呼敬之哉備禮以崇
其好合起家而居其爵位非義信不固非溫順不
親克恭匪懈則罔攸悔朕言必復可不慎歟

德宗冊杞王妃文

唐陸贄

維建中二年十一月某日甲子皇帝使其官持節
冊命某官竇烜第若干女爲杞王妃曰於戲禮以
大婚崇繼嗣本人倫之教詩言淑女配君子繫王
化之綱蓋率人成風由內及外得不采嘉耦以固
盤石形閨門以御家邦詳求維難歷選滋久時乃

之擇得于舊姻柔婉稟乎天和禮樂成于家法明
章婦順虔奉姆儀克茂鵲巢之規協宣麟趾之美
其祇膺嘉禮欽率內教淑慎厥心無替於後嗚呼
可不慎歟

以上俗體

哀冊

高祖神堯皇帝哀冊文

太宗

唐虞世南

維貞觀五年太歲辛卯某月日大行太上皇帝崩
于某宮之某殿旋殯于某殿之西階即以明年某
月日遷座于獻陵禮也玄覽載籍逖聽皇王立德

可久應運斯昌天基崇峻帝系悠長虹暉降祉真
氣呈祥葱蘅朱黻熊軾龍常契協禎符誕生睿聖
彤雲晝聚黃星夕映舒卷潛躍幾深道性地載天
臨日暉川鏡歷試藩岳風移俗正火德云謝羣龍
戰野虫尤耀旗王良策馬拔山曠日滔天泯夏蕩
拒黎元阡危宗社提劍創業仗鉞專征風驅雲動
海運天行伐謀上畧制勝神兵尊王踐土復帝夷
庚職維上相任隆羣辟六階已平四門咸闢殊物
顯命彝章典冊錫重介珪禮優乘石煙霞改色鏞
管變音觀國受命負宸君臨仁霑動植化感飛沈

殷輅周冕禹迹堯心削觚反樸抵壁藏金商俗未
改遺氛阻亂沙塞虔劉伊瀍叛渙應變雷動乘機
電斷十角雲消三川冰泮漸以文教致諸王道制
禮和樂尊儒養老翠鳳棲梧丹魚在藻水浮玄貝
階榮朱草威加海外澤被區中要荒合軌鞮羯遐
通沒羽沈浪飛輪駕風眷言釋負有懷高謝脩爾
櫟陽杳同姑射音趨詩禮以承天稟義方以成化
聿膺景福方期永年玉几奄及金滕遂愆絕五日
月晨外遽千齡而上僊攀帷宸以孺慕抱劔烏以
纏綿嗚呼哀哉虔奉顧託式遵遺志指珠一而不

藏即陶甄以成器貽儉德以爲譽垂風聲於後嗣
嗚呼哀哉永去天邑言遵地肺背沃野之神臯越
通川之清渭懷岐下之前迹眷新豐之舊里笳哀
噓以留思旒翩翩而顧指悲風急而拱木吟平野
晦而寒煙起嗚呼哀哉惟綴衣之如昨忽馳光之
莫駐亟時逝而節改俄涉新而履故野蒼蒼以日
衰歲凜凜而行暮感物悲於氣序銜哀踐於霜露
泣川水之逝波動商山之風樹躋厚地而無感仰
高天而何訴嗚呼哀哉曰聖與人誰前誰後炎昊
無金石之固勛華異松喬之壽孰歷世而長存唯

令名之不朽矧玄功與至德冠列辟而為首俾軼
五而登三與天長而地久嗚呼哀哉

睿宗玄真皇帝哀冊文

玄宗

唐蘇頌

維開元四年歲次景辰六月乙巳朔二十日甲子
大行睿宗大聖玄真皇帝崩於百福殿徙殯于太
極殿之西階粵十月朔某日將遷座于橋陵禮也
素帟褰周青壺警節儼無聲以虛衛陳有象而成
列哀子開元神武皇帝某追攀引繚眇擗司常懷
庶物其涕迸感衆靈而影彰矐茲鴻業欽若要道

爰制近臣敢揚大寶其詞曰

高祖興唐垂其耿光睿宗誕慶紹我明命明命伊
河重熙累盛耿光伊何翊善傳聖在昔分瑞爰初
剖符宅殷令典居相宏圖宣哲觀藝祗庸服儒踐
其成式納以嘉謨否歷終泰傾維更紐予從代王
子事周母退象藏密沖襟釋負不為震驚自得謙
受權乃復亨塞而自開固推皇弟仍陟元台鳴牝
構孽紛虹肆災飈馳神武電掃姦回三讓天下載
登宸極順夫耽心忘我帝力鞅譯脩貢親賢任職
樂英已敷禮緯重繹宗廟率祀郊丘肇裡養而迎

夏芟以祈春靜默沿道和平返淳智周翔泳功濟
陶鈞知子維明從吾所尚陋伊祈之莫緒追齧缺
而將喪帝允執乎厥中皇遂崇於太上始授圖而
觀終脫屣以清曠齋必閒館朝而別宮問安順
色資孝弘風理極兼受言承至公豈綴衣而憑几
忽成鼎而號弓嗚呼哀哉夢年罕驗顧是付囑屬
神器其得所委靈心其何欲增摧絕以孺慕竟厭
時以去俗萬邦赴而同軌六遂陳而帥屬外羣悲
於縞素中不瘞於珠玉蜃輅迎轉龍慌戒徂寒生
紫殿曉發清都笳挽遲遲而徙靡旆旌戀戀以威

紆除櫟陽之御路指橋嶽之幽途禮既獻而三徹
神方寧而九虞遠遊通冠近嚴歸蹕因高而渭川
盡見馮下而秦京稍出積耘草以橫霜攢悲松以
翳日嗚呼哀哉粵義軒之建子妙兮令問傳其不
已猗簡冊之尊聖真兮鴻名冠而方始然後景雲
藹華露滋揚至德殷永思此天子之孝也臣何足
以知之嗚呼哀哉

文明皇后

文帝后
王氏

哀策

晉史臣

姓名
闕

明明先后興我晉道

章淑問以翼皇考邁德宣

猷大業有造貽慶孤據堂構是保庶資復顧永享
 難老奄然登遐棄我何年沈哀罔訴如何穹昊嗚
 呼哀哉厥初生民樹之惠康帝遷明德顧予先皇
 帝文天立厥配我皇是光作邦作對德音無疆愍予
 不弔天篤降殃日沒明夷中年隕喪叶平聲煢煢在
 疚永懷摧傷尋惟景行於穆王已海岱降靈世荷
 繁祉永錫祚胤篤生文母叶姥罪反誕膺純和淑慎容
 止質直不渝體茲孝友叶羽執反詩書是悅禮籍延紀
 三從無違中饋允理追惟先后景帝后羊氏勞謙是尚
 爰初在室竭力致養嬪于大邦皇基是相謚靜隆

化帝業以創內叙嬪御外協時望履信居順德行
 洽暢密勿無荒劬勞克讓崇儉抑華冲素是放雖
 享崇高歡嘉未饗胡寧棄之我將曷仰咨余不造
 大罰荐臻叶音先皇考背世始踰三年仰奉慈親冀
 無後艱凶災仍集何辜于天嗚呼哀哉靈輻夙駕
 設祖中闈輻輳動軫旣往不追哀哀皇妣永潛靈
 暉進攀梓宮顧援素旂屏營窮痛誰告誰依訴情
 贈策以舒傷悲尚或有聞顧予孤遺嗚呼哀哉

武元皇后武帝后哀策

晉史臣姓名

天地配序成化兩儀王假有家道在伉儷叶平姜

嫫佐譽二妃興媯仰希古昔冀亦同規今胡不然

景命夙虧嗚呼哀哉我應圖籙統臨萬方正位于

內寔在嬪嬙天作之合駮發之祥河嶽降靈啓祚

豐陽奕世豐衍朱紼斯煌續女維行受命溥將來

翼家邦憲度是常緝熙陰教德聲顯揚昔我先妣

文帝后王氏暉曜休光后承前訓奉述遺芳宜嗣徽音

繼序無荒如何不弔背世隕喪叶平望齊無主長

去烝嘗追懷永悼率土摧傷嗚呼哀哉陵兆既窆

將遷幽都宵陳夙駕元妃其徂宮闈遏密階庭空

虛設祖布紼告駕啓塗服翬禴狄寄象容車金路

掩藹裳帳不舒千乘動軫六驥躊躇銘旌樹表翼

柳雲敷祁祁同軌岌岌烝徒孰不云懷哀感萬夫

寧神虞卜安體玄廬土房陶篋齊制遂初依行紀

謚聲被八區雖背明光亦歸皇姑沒而不朽世德

作謨嗚呼哀哉

敬皇后明帝后哀策文

齊謝朓

維永祚明帝元年秋九月朔日敬皇后梓宮啓自

先塋將祔于某陵其日至尊指東親奉奠某皇帝

先塋將祔于某陵其日至尊昏侯親奉奠某皇帝

是年七月明帝已崩尚未有謚乃使兼太尉某設祖於行宮禮也

翠帟舒阜玄堂啓扉俎徹三獻筵卷六衣哀子嗣

皇帝懷蜃衛而延首想鷺輅而撫心痛椒塗之先

郭哀長信之莫臨身隔兩赴時無二展時帝后並喪故稱兩

一旋詔左言左史記言光敷聖善其辭曰

帝唐遠胄御龍遙緒在秦作劉在漢開楚肇維淑

聖克柔克令清漢表靈曾沙膺慶春秋時沙麓崩晉史卜之曰後

六百四十五年宜有聖女興其齊田乎爰定厥祥徽音允穆光華沼

沚榮耀中谷敬始紘經教先種稷睿問川流神襟

蘭郁先德韜光君道五臣本作臨方被于佐求賢所謂

無訛顧史弘式陳詩展義厚下曰仁藏往伊智十

亂斯俟四教罔忒思媚諸姑貽我嬪則化自公宮

遠被南國軒曜軒轅星台象也懷光素舒月也佇德閔予不

祐慈訓早違方年冲藐懷神靡依家臻寶業身嗣

昌暉壽宮寂遠清廟虛歸嗚呼哀哉帝遷明命民

神胥悅乾景外臨陰儀內缺空悲故劔徒嗟金穴

璋瓚奚獻禕禴罔設嗚呼哀哉馮相告祲宸駕長

往貽厥遠圖末命是獎懷豐沛之綢繆兮背神京

之弘敞陋蒼梧之不從兮遵鮒隅山名嶺項與九嬪葬處以

同壤嗚呼哀哉陳象設於園寢兮映輿銛忙范反馬飾也

文選月辭卷三下 復冊

於松楸望承明而不入兮度清洛而南游繼池緯
於通軌兮接龍帷於造舟迴塘寂其已暮兮東川
澹而不流嗚呼哀哉藉闕宮之遠列兮聞續女之
遐慶始協德於蘋蘩兮終配祀而表命慕方經於
賜衣兮哀日隆於撫鏡思寒泉之罔極兮託彤管
於遺詠嗚呼哀哉

太宗文德皇后哀冊文

唐虞世南

維貞觀太宗十年歲次甲申六月己未朔二十一日
己卯大行皇后崩於立政殿粵九月十日丁酉

將遷座于昭陵禮也殯宮夕啓靈輅曉前儼帷帟
於空殿肅陛衛於靈筵皇帝親臨宵載義深追遠
瞻青蒲而永絕悼玉階之莫返蜃輅將引犧樽已
徹爰詔記言式揚徽烈其詞曰

二儀合德兩曜齊光列聖觀象邦家克昌猗歟華
族英靈降祉比齊越姜匹宋踰子育德高門騰芬
素里體仁將聖披圖閱史造舟爲梁嗣徽前德履
和思順自家刑國淑問不已柔風允塞紉組報勤
璫珩垂則時逢昌聖運屬休徵代邸膺曆唐侯嗣
興紫宮並耀黃道偕昇化宣風始業贊丕承比德

文獻通考卷三十一
無競凝神不測應物通理撫機先識體備賢能暉
無佻側績包九亂恩加八極性道希夷言容莊敬
戒奢處約懷沖履正景暖風暄霜嚴冰淨領畧三
古箴規六行源濬流遠時昌祚延國貞誕叡皇支
挺賢談高辯日學冠通玄慈訓所及懿德光前五
福云備千齡方求地紀絕維月輪韜景辰興不豫
德音彌整馬鬣無封鶴珠斯屏嗚呼哀哉異人神
於倏忽變容服於平生改清蹕以哀挽易朱旗以
素旌昔照朝景響環佩於曾城今冥永夜吟松栢
於山楹嗚呼哀哉氣變灰飛暑退寒襲煙觸樹而

凝慘露分枝而垂泣聞哀鴈之夕飛聽悲風之曉
急仰雲霄而求慕慟陵寢其何反嗚呼哀哉背玄
武而北轅絕牽牛而橫度途去去而逾遠馬駸駸
而不駐想渭水之貫都歎黃山之隱霧嗚呼哀哉
嗟人生之浮促若飄風之過牖牖何風而暫停人
何生而能久唯承天與載物邈慈深而德厚邁任
妙之高蹤播英聲而無朽嗚呼哀哉

貞懿皇后

代宗后哀冊文

唐常袞

維大曆

代宗

十年歲在辛卯十月辛酉朔六日丙

文獻通考

卷三十一

三十一

寅貴妃獨孤氏薨粵明日追謚曰貞懿皇后殯于
內殿之西階十三年十月癸酉乃命門下侍郎同
平章事常袞持節冊命以其月二十五日丁酉遷
座于莊陵禮也素紗列位黼帟周庭輅升玉綴軒
缺珠櫺皇帝悼鸞掖以追懷感麟迹而增慟備百
禮以殷遣命六官而袞送宗祝薦告司儀降收爰
詔侍臣紀垂鴻休其辭曰

祚祉悠久寵靈誕受元魏戚藩周隋帝后五侯迭
興亡貴居右肇啓皇運光膺文母纘女是因以綱
六倫生知陰教育我蒸人瑞雲呈彩瑤星降神聰

明睿智婉麗貞仁惟昔天監搜求才淑龍德在田
葛覃于谷周姜胥宇漢后推轂王業維艱嬪風已
穆繼文傳聖嗣徽克令不耀其光乃終有慶祇奉
園寢肅恭靈命越在哀榮聿追孝敬文織絲組朱
綠玄黃上供祭服以祀明堂法度有節不待珩璜
篇訓之制自盈縑紉叙我邦族風於天下始於憂
勤協成王化慈厚諸女寵臨下嫁登進賢才勞謙
日夜服繒示儉脫簪申誠訪問後言讌遊夙退內
加羣娣動有矜誨外睦諸親泣辭封拜闕翟有日
親蠶俟時忽歸清漢言復方祗萬乘悼懷羣臣慕

思王衣追慶金鈿同儀嗚呼哀哉去昭陽兮宵然
乘雲駕兮何在在人代宛兮如舊炎涼倏兮已改翠
葆森以成列素旗儼而相待言從玉兆之貞永闕
瑤華之彩別長秋之西苑過望春兮南登招帝子
于北渚從母后於東陵下土清兮動金翠外無像
兮中有馮合簫挽以攢咽結雲雨之淒凝吾君感
於幽期俯層亭而望思慘嬪媛以延竚極容衛以
盡時搖巾袂兮遠訣隔軒檻兮羣悲不復見兮迴
御輦傷如何兮軫睿慈下蘭臯兮背芷陽旌悠悠
兮野蒼蒼帶白花兮掩淚衣去衫衣兮斷腸當盛

明兮共樂忽遊處兮獨傷去故廷兮日遠即新宮
兮夜長襜無文繡之飾器無珠貝之藏蓋自我之
立制刑育國之大方嗚呼哀哉見送往之空歸歎
終焉之如此方士神兮是非甘泉畫兮疑復似
遺音在於玉璜陳迹留於金祀獻萬壽兮無期存
二南之餘美舊唐書云哀當代才臣詔為哀詞文百悽悼覽之者惻然
莊恪太子文宗長子哀冊文

唐王起

維大唐開成文宗年號三年歲次戊午十月乙酉朔十
六日庚子皇太子薨于少陽院十七日辛丑遷座

于大吉殿十一月乙卯朔二十四日戊寅命冊使
太子太師兼右僕射門下侍郎國子祭酒平章事
鄭覃副使中書侍郎平章事楊嗣復持節冊謚曰
莊恪十二月乙酉朔十二日丙申葬于驪山之北
原莊恪陵禮也玉琯歲窮金壺漏盡祖奠告徹哀
笳將引庭滅燎而月寒路搖旄而風緊皇帝念主
鬯之缺位悼佩觿之天年銅樓已閉銀牒徒懸方
追思於對日遽冥冥而賓天典冊具舉文物咸備
爰詔侍臣頌揚上嗣其詞曰
皇矣帝緒肇基綿古種德尊道宗文祖武上聖開

成天下和平儲祉發祥是先元良覃討之初岐嶷
用彰蘊才游藝玉裕金相既免孩提是加封殖俾
維城於東魯錫介珪於上國辭榮朱邸正位青宮
尊師重傅養德含聰畏馳道而不絕問寢門而益
恭招賢警戒齒胄謙冲冀日躋於三善奉天慈於
九重漢莊好學既顯於外魏丕能文方循於內美
不二於顏過嘉得三於鯉退焜耀甲觀鏗鏘瑜珮
方積善於爲山何反真而游岱嗚呼哀哉憂兢損
壽沈疴始邁羣望並走百靈宜祐吳客之問徒爲
越人之方靡救占前星之掩曜知東朝之降咎天

垂象而則然。由已而何有。嗚呼哀哉。稅駕乘華
兮。即宮夜臺。鳳笙長絕。兮。蜃輅徐來。啓青宮而右
出。歷玄灞而左。迴度凋林。兮。魂斷入曠野。兮。心摧
水助。挽而幽咽。雲帶翼而徘徊。悲佳城之已掩。見
新廟之方開。嗚呼哀哉。授經兮。曷期執紼。兮。增歎
九原作兮。何嗟及七日還兮。安可希有少海之波
逝。無西園之蓋飛。商山之羽翼已散。望苑之賓客
咸歸。瑟彼玉簡。闕于泉扉。用專信於文字。願不昧
於音徽。嗚呼哀哉。

東平憲王蒼哀策

漢章帝

維建初八年三月己卯。皇帝曰。咨王丕顯勤勞。王
室親受策命。昭于前世。出作藩輔。克慎明德。率禮
不越。傳音敷聞在下。昊天不弔。不報上仁。俾屏余一
人。夙夜熒熒。靡有所終。今詔有司。加賜鸞輅。乘馬
龍旂。九旒。虎貢百人。奉送王行。匪我憲王。其孰離
也。被之魂而有靈。保茲寵榮。嗚呼哀哉。

惠莊太子

初名成義。後名
攝睿。宗弟二子。

哀冊文并序

唐張九齡

維開元

年號

二十年歲次甲子十二月丁巳朔二

十四日庚辰。司徒申王薨于行在所。冊謚惠莊太

子旋殯于寢奧閏十二月二十七日壬子將陪葬
于橋林之栢城蔽幕宵布羽纛宿設西序啓攢南
首成列皇帝深天倫之戚崇后儲之禮擬容衛於
青宮申孔懷于朱邸爰命史氏稽於令則無俾直
書不彰遺德詞臣曰

昊天有命先后受之分王子弟藩衛京師克荷成
憲罔弗肅祗懿哉明哲誕維神粹宣慈日聞孝友
天至道則脗合迹無自異性則生知學兼時習易
微書遠詩言禮立德必有隣善如不及貴而能損
量固難挹方伯出鎮召南取斯司徒入掌鄭武其

宜之所在政乃克施物留遺愛事著成規西夏
息人東征協卜鞞鞞同輦皇皇改服疾遘中路凶
傳左轂寧不憖遺奄鍾斯酷嗚呼哀哉昔在冲妙
具惟兄弟四國並封五王均體遊必連騎居則同
邸各承愛於含飴俱受經於置醴旣荏苒而云邁
屬殷憂之將啓實定禍於蕭牆遂繼明於雲陛雖
隔深宮之衛常洽家人之禮曷殂謝以痛心感平
生而流涕嗚呼哀哉爰擇茂典追崇上嗣表先聖
之元良申友于之褒異紛鹵簿以徒設儼文物而
空備彼神儀之如在乃羣悲之所萃周禮從祔漢

瑩是陪先遠日而選吉會同盟以送哀夜漏盡兮
暗室啓庭燎殘兮曉挽催按三校而徐進將一去
而不迴嗚呼哀哉背朱門兮遲遲馳白驥兮駸駸
野蒼茫而助慘風蕭颼而增悲翩翩兮素蓋寂寂
兮畫帷遵舊途而何有覽陳迹以如疑面都邑兮
不入侍陵寢兮有期惟光儀之永闕與昭代而長
辭嗚呼哀哉潛清暉於幽窆召鴻名於美跡將在
皇儲之史豈伊諸侯之策播遺芳於蘭桂傳不朽
於金石諒旣言之在茲嘉德音之無斃嗚呼哀哉

興王召哀冊文

唐詞臣姓名

維上元

肅宗年號

元年太歲庚子六月己未朔二十六

日甲申皇第十二子持節鳳翔等四州節度觀察

大使興王召薨于中京內邸殯于寢之西階粵八

月丁亥冊贈皇太子廟號恭懿冬十一月庚寅詔

葬于長安之高陽原禮也鸞隧開封龍輜進轍陳

祖載而就位儼塗芻以成列皇帝哀玉林之闕景

憫璿萼之維霜瞻龍綽而增思懷鴈池而永傷考

謚維古褒崇有式爰詔史司恭宣懿德其辭曰

維天祚唐累葉重光中興宸景再紐乾綱本枝建

國磐石疏疆克開龍胤寔曰賢王驪源孕彩日幹

騰芳深仁廣孝蘊藝含章秀發童年惠彰齒齒蹈
禮知方承尊協旨對日流辯占鳳擅美魯衛後塵
間河平東絕軌胡孽初構王師未班爰從襁褓載
歷險艱愛備中掖名崇懿藩居常稟訓動不違顏
禮及佩觴朝加分器胙土延渥登壇受帥玉質金
聲文經武緯樂善爲寶崇儒是貴濬哲外朗溫文
內深閱書成誦觀樂表音五經在口六律諧心才
優藝洽絕古超今蛇豕猶梗寰區未乂滌慮祈真
焚香演偈食去葷血心依定慧庶福邦家俾清兇
穢霧露嬰疾聰明害神沈痾始邁彌曠盈旬止慮

無擾發言有倫在膏方亟問膳逾勤雲物告徵星
辰變象楚藥無救秦醫莫伏靈儀宵而上賓徽音
邈其長往違舊邸於青社即幽陵於黃壤嗚呼哀
哉魂氣奪兮去何之精靈存兮孝有思念君親之
永隔託夢寐而來辭延桂宮而震悼貫椒壺而纏
悲旌遺芳於碣館賁新命於儲闈嗚呼哀哉先遠
戒候占龜獻吉指鶉野而西臨背鳳城而右出天
慘慘而苦霧山蒼蒼而曠日望馳道而長辭赴幽
塗而永畢嗚呼哀哉生爲寵王兮宸愛所鍾歿追
上嗣兮朝典斯崇升玉笙於洞府閱銀榮於泉宮

金石誰固人生有終簡冊攸記兮德音無窮敢直
詞於篆美庶求代而成風嗚呼哀哉

諸葛亮哀冊

漢後主

維君體資文武明叡篤誠受遺託孤匡輔朕躬繼
絕興微志存靖亂爰整六師無歲不征神武赫然
威震八荒將建殊功於季漢叅伊周之巨勲如何
不弔事臨垂克邁疾隕喪朕用傷悼肝心若裂夫
崇德序功紀行命謚所以光昭將來刊載不朽今
使使持節左中郎將杜瓊贈君丞相武鄉侯印綬
謚君為忠武侯魂而有靈嘉茲寵榮嗚呼哀哉嗚

呼哀哉

贈冊

贈元敬虞皇后策

晉元帝

皇帝咨前琅邪王妃虞氏朕祗順昊天成命用陞
帝位悼妃夙徂徽音潛翳御于家邦靡所儀刑陰
教有虧用傷乎懷追號制謚先王之典今遣持節
兼太尉萬勝奉冊贈皇后璽綬祀以太牢魂而有
靈嘉茲寵榮

謚冊

德宗神武皇帝謚冊文

宗順

唐權德輿

維永貞元年歲次乙酉某月朔日孝孫嗣皇帝臣
某誦伏維大行皇帝德合天地作人父母纂承光
明建用皇極昔在寶應制天下賦輿咸藩以大自
魯疏雍師律既貞會陝收洛克燁威命廓開至塗
是登上嗣乃宅丕后服藝祖神宗之大烈有乾乾
翼翼之至敬敷佑迪哲尊嚴懿恭濁明四極發育
萬類濯沐乎仁澤澄清乎理本巍巍乎建中風聲
與貞觀同符涓時有祲沴變生京穀省方展義弘
陰隲之功整旅致誅申震耀之令氛祲滅息侯王

軌道丕冒持載鏡清砥平然後明禋步祀萬靈以
接翕受敷施元德咸事含弘亭毒以致其和博采
虛受以通其志政刑有箴宸扆有銘煥乎文明之
化成也因時創節象卦設樂薰然中和之被物也
納嘉言於近侍輟已行之詔疾讒口於宵人宥過
失之罪去徽號而約已正廟祧以尊祖九譯通道
萬方來庭寶旅焯乎勲籍夷歌陳於樂府霜露所
墜車書大同順氣旁達天休滋滋至慶霄輪困德水
清澈三辰秉陽以宣耀百嘉麗地而交感飛走呈
祥肖翹遂性在宥天下二十有七年夫文思光被

陶唐之盛也惜怛忠利虞帝之教也疊疊穆穆周
文之業也聰明神武漢祖之烈也窮古先之大律
極帝者之上儀方將苞升崇丘符檢王牒奄遺天
命永棄萬方億兆嗷嗷哀號靡訴顧惟冲昧懼忝
孫謀君父有命付茲神器虔恭貽訓感慕滋深今
因山既建同軌畢至一二元老宗工碩生考稱天
之禮稽節惠之法式遵古義敢薦大名謹遣太尉
某謹奉冊上尊謚曰神武孝文皇帝廟曰待宗伏
維聖靈昭格膺是典禮幽贊丕祉流於無窮嗚呼
哀哉

懿宗上元昭皇太后謚冊文

唐夏侯孜

維大中十三年歲次己卯九月癸丑朔二十七日
己卯嗣皇帝臣伏惟先太后體貞明以合天本懿
粹而象地發秀于外含章在中由潁川以表祥配
沙麓而比德塗山佐夏莘野興商潛曜空蘊於方
祗祕景莫觀於圓魄卓爾潔操穆然凝輝欲報之
德昊天罔極臣猥以冲昧獲奉宗祧休惕哀勞慮
墜大寶而天意允若人心克諧惟懷永圖懼乖未
命退省蒙固上感劬勞繫鏡無塵賜衣有篋宸儀

雖閔慈旨長存莫追蘭殿之晨昏空感椒塗之霜
露言成陰教行著國章逮事靡及於循陔終古徒
哀於陟屺敢舉追崇之典寧申顧復之思伏惟舉
位以定名考謚以尊德所以揚茂烈傳休聲率由
舊章竊擬素範今禮官詳議庶僚稱贊備陳徽數
克播令猷正位號於瑤齋森禮容於金祀毋儀無
斲廟貌有嚴將亨鴻休實憑玄祐謹遣攝太尉門
下侍郎兼兵部尚書平章事蕭鄴奉冊上尊謚曰
元昭皇太后伏惟明靈昭格俯鑒精誠時已逝而
敬在六衣夜不陽而禮存三獻維是薦享與唐無

疆嗚呼哀哉謹言

王導謚冊

晉成帝

蓋高位以酬明德厚爵以答懋勲至乎闔棺標跡
莫尚號謚風流百代於是乎在維公邁達沖虛玄
鑒劭邈夷淡以約其心體仁以流其惠棲遲務外
則名雋中夏應期濯纓則潛筭獨運昔我中宗肅
祖之基中興也下帷委誠而策定江左恭已宅心
而庶績咸熙故能感之所振寇虐改心化之所鼓
搆杌易質調陰陽之和通彝倫之紀遼隴承風丹
穴景附隆高世之功復宣武之績舊物不失公協

其猷若乃荷負額命保朕冲人遭遇難圮夷險委
順拯其淪墜而濟之以道扶其顛傾而弘之以仁
經緯三朝而蘊道彌曠方賴高謨以穆四海昊天
不弔奄忽薨殂朕用震慟於心雖有殷之殞保衡
有周之喪二南曷諭茲愴今遣使持節謁者僕射
任瞻錫謚曰文獻祠以太牢魂而有靈嘉茲榮寵
贈謚冊

贈謚温嶠冊

晉成帝

朕以眇身纂承洪緒不能光闡大道化洽時雍至
乃狂狡滔天社稷危逼維公明鑒特達識心經遠

惟皇綱之不維忿凶寇之縱暴唱率羣后五州響
應首啓戎行元惡授馘王室危而復安三光幽而
復明功格宇宙勲著八表方賴大猷以拯區夏天
不憝遺早世薨殂朕用痛悼于厥心夫褒德銘勲
先王之明典今追贈公侍中大將軍持節都督刺
史公封始安公如故賜錢百萬布千匹謚曰忠武祠以
太牢

贈謚郗鑒冊

晉成帝

維公道德冲邃體識弘遠忠亮雅正行爲世表歷
位內外勲庸彌著乃者約峻狂暴毒流朝廷社稷

之危賴公以寧功侔古烈勲邁桓文方倚大猷藩
翼時難昊天不弔奄忽薨殂朕用震悼于厥心夫
爵以顯德謚以表行所以崇明軌迹丕揚徽劭今
贈太宰謚曰文成祠以太牢魂而有靈嘉茲寵榮
祭冊

詔祭楊震策

漢順帝

安帝時震以直言免歸飲酖而卒帝即位連有災異感震之枉乃下詔策曰

故太尉震正直是與俾匡時政而青蠅點素同茲
在藩上天降威災眚屢作爾卜爾筮維震之故朕
之不德用彰厥咎山崩棟折我其危哉今使太守

丞以中牢具祠魂而有靈儻其歆享

賜冊

報張禹策

漢成帝

朕以幼年執政萬機懼失其中君以道德為師故
委國政君何疑而數乞骸骨忽忘雅素欲避流言
朕無聞焉不聞流言君其固心致思總秉諸事惟以孳

孳無違朕意加賜黃金百斤養牛上尊酒太官致

餐侍醫視疾使者臨問

禹惶恐復起視事○按帝之報張禹禮意懇至文詞

溫雅可為後世人主之式矣惜乎施非其人耳

詔車騎將軍馮緄策

漢桓帝

蠻夷猾夏久不討攝提各焚都城蹈藉官人州郡
 將吏臣職之臣相逐奔竄曾不反顧可愧言也將
 軍素有威猛是以擢授六師前代陳湯馮名奉傳
 名介之徒以寡擊衆郅支夜郎樓蘭之戎頭懸都
 街衛名去霍名去北征功列金石是皆將軍所究覽
 也今非將軍誰與脩復前迹進赴之宜權時之策
 將軍一專之出郊之事不復內御已命有司祖于
 國門詩不云乎進厥虎臣闕如虓虎怒虎敷敦布
 淮濱仍執醜虜將軍其勉之

賜丞相諸葛亮策

漢昭烈

朕遭家不造奉承大統兢兢業業不敢康寧思盡
 百姓懼未能綏於戲丞相亮其悉朕意無怠輔朕
 之闕助宣重光以照明天下君其勗哉

詔復諸葛亮丞相策

漢後主

建興六年亮使馬謖督諸軍與魏張郃戰于街亭謖違亮節制敗績亮戮謖上跡
自貶後主以亮為右將軍行丞相事七年亮平武都陰平詔策亮曰

街亭之役咎由馬謖而君引愆深自貶抑重違君
 意聽順所守前年耀師誠斬王雙今歲爰征郭淮
 遁走降集氐羌興復二郡即武都威震凶暴功勳
 顯然方今天下騷擾元惡魏未梟君受大任幹國

之重而又自挹損非所以光揚洪烈矣今復君丞相君其勿辭

免冊

賜史丹策

漢成帝

左將軍寢病不衰願歸治疾朕愍以官職之事久留將軍使躬不瘳使光祿勳賜將軍黃金五十斤安車駟馬其上將軍印綬宜專精神務近醫藥以輔不衰丹歸第數月薨口宋真德秀曰漢免大臣免薛宣翟方進哀帝免孔光師丹馬官傳喜皆極其切責無復遷就為諱之意方進至於自殺豈所以待臣哉唯此策辭頗溫厚得進退大臣體故錄之

免彭宣策

漢哀帝

有司數奏言諸侯國人不得宿衛將軍不宜典兵馬處大位朕惟將軍任漢將之重而子又前取淮陽王女婚姻不絕非國之制使光祿大夫曼姓未詳賜將軍黃金五十斤安車駟馬其上左將軍印綬以關內侯歸家按成帝免史丹體其情也哀帝免彭宣裁以法也雖非誠心亦可以為文辭之法

文體明辯卷之二十一

大明吳江徐師曾伯魯纂

批答

按吳訥云批答者天子采臣下章疏之意而答之也古者君臣都俞吁咈皆口陳面命之詞後世乃有書疏而答之者遂用制詞若漢人答報璽書是已至唐始有批答之名以謂天子手批而答之也其後學士入院試制詔批答共三篇則求代言之人而詞華漸繁矣蓋自唐太宗答劉洎之後未有不假手於詞臣者今取諸集所

載批答擇其工者列之而散文四六仍分爲古俗二體云

古體

批答張九齡賀誅奚賊可突于

唐玄宗

用兵之上者脩政於廟堂折衝千里之外此之謂也小寇適降復爲翻動邊軍除翦有國常刑朕方事籍田而今獻捷當鑄劔戟以爲農器也

德宗答百寮請停大禮表

唐陸贄

朕再經播遷久曠禋祀不唯霜露之感實貽墜失之憂賴先澤在人上帝臨我克平大難再復舊京朕之失德非曰能補旋欲請罪宗廟展敬郊丘迫以羣情俟于獻歲今滌牲撰吉甫及近期齋心求懷明發不寐忽覽來表良深矍然雖嘉備慮之誠實乖昭事之意朕志先定期於必行即斷來表也
賜皇長子淮陽郡王辭免恩命不允批答

宋王珪

昔我祖宗誕受天命厥維艱哉克正皇猷丕懋乃績以遺我子孫無疆之休今朕纂厥服維稽古建

爾元子于有邦乃季秋辛亥羣公庶尹罔不祇朕
言于廷爾乃陳德弗及期畀于一二弟兄之賢我
聞曰立愛維親立敬維長其敢示天下以私虐汝
維往哉尚迪時命無違

批答顏真卿表讓憲部尚書

唐肅宗

卿才推翰苑望重朝廷昆弟成名俱效忠節頃蜂
虿縱毒郡邑多虞卿能審事宜捍禦兇盜雖平原
不守而功效殊高自遠歸朝深副朕望允膺曳履
之命無至免冠之請

批答崔與之辭免叅知政事第六劄子

宋理宗

卿忠清足以範俗惠直足以擾邦國之紀也民之
望也朕自去秋以來數降詔書趣卿政路而奏牘
來上至於五六殊拂朕意夫有德者進則朝廷尊
嚴疆暴消靡卿便可驅車造朝秉德輔時不責卿
以事

賜宰臣富弼上第一表乞解機務不允批答

宗仁

宋歐陽脩

省表具之夫宰相之事非可以歲月考而一二數

也其在朝廷選賢任能而各得其職下俾民俗遷善遠罪而不知其然至於法度脩紀綱正然後相與慎守而安行之以臻于治此朕所以虚心一意日有望於卿者也今事有緒而卿辭焉豈朕德之不明將顧時之不可中道而止夫何謂哉俾予獲用材不盡之譏而卿涉苟安自便之計予所不取卿其勉焉所乞宜不允

賜宰相呂公著乞解罷機務不允斷

來章批答

宋歐陽脩

省表具之卿博通古今之學深達治亂之原德業

之隆名稱甚盛朕方虛已而任不愧知人之明而自秉鈞衡宣勞夙夜維是小大之政損益施設唯卿之爲罰罪賞功進退能否唯卿之聽時有異論豈無多言一切屏之唯卿之信若乃恭已南面庶幾輔予享其成功登于至治亦唯卿之圖其三者人君之所難予罔敢忽其一者在卿之不止庶克有成而無名屢辭實所難諭卿其體茲至意究乃素懷所乞宜不允仍斷來章

賜宰相呂公著乞罷相位不允斷來章批答

宋蘇軾

古者君臣之間率常千載一遇今聖母在位正身
虛已仰成輔弼雖踈遠小臣猶欲畢命自效而卿
乃以小疾求去縱無意於功名獨不惜此時乎勉
卒乃事使百姓富足四夷乂安然後謝事歸老豈
不臣主俱榮哉

賜太師文彥博乞致仕不允批答

宋蘇軾

卿出入四世師表萬民無羨於功名而有厭於富
貴其所以忘身徇國捨逸就勞者豈有求而然哉
凡以先帝之恩生民之欲也卿之在朝如玉在山

如珠在淵光景不陳而草木自遂去就之際損益
非輕昔西伯善養老而太公自至魯穆公無人子
思之側而長者去之卿自爲謀則善矣獨不爲朝
廷惜乎藥餌有間時遊廟堂家居之樂何以異此
俗體

批答劉洎

唐太宗

洎上書諫太宗詰難
臣寮上言故答之云

非慮無以臨下非言無以述慮比有談論遂至煩
多輕物驕人恐由茲道形神心氣非此爲勞今聞
謹言虛懷以改

答百寮請復御膳表

德宗

唐陸贄

頃者大勞不息至化未孚雨澤愆期蟲蝗爲害朕以銷災謝譴莫大於循誠節用愛人必先於克己顧慙愆咎躬貶膳羞下以均衆庶之憂上以答昊穹之敬至誠或感嘉應遂臻宿麥方成元兇已殄慶深德薄惕厲彌加忽覽表章過爲稱述雖將順其美則曰乃誠而戒慎不忘諒維朕志未喻來請深體此懷

批答張九齡謝蒙太子書頌

唐玄宗

大臣作頌以揚休聲銘之琬琰亦資翰墨太子鴻書則非工身爲國本將示于後因以命之無能發揮何所爲謝

批答張九齡謝工部侍郎集賢院學士

唐玄宗

卿學府高標士林貞幹論思之地亦旣優閒彌綸之司聊從應務別當獎擢何乃謙撝所謝知批答張九齡謝知制誥

唐玄宗

昔掌王言以宣國命頃來相習多事游詞卿舊在掖垣已推才識及登書府備探微奧故有特命宜副朕心何所謙撝誰與爲讓

批答顏真卿表謝荆南節度使

唐肅宗

卿明邁偉才忠貞壯節夙推公器累踐周行專城高魏尚之勛會府著山濤之績而七澤交帶三江要衝式資統尹之方雅屬旌旄之寄人存政舉其在茲乎所謝知

答盧虔謝賜男從史德政碑文并移貫屬京

兆表

唐白居易

卿男從史爲國重臣自領大藩厥有成績公忠茂著政理殊尤勒石所以表勲賜文所以褒德惟功是念有善必旌是國舊章非予私渥昨又請移鄉貫願隸京邑家聲益振臣節逾章雖清望標門崇冠山東之族而丹心戀闕恥爲關外之人載省懇誠彌深嘉嘆所謝知

答京兆府二十四縣耆壽謝賑貸表

唐白居易

朕勤求人隱慎卹農功念播植之時必資首種慮

懸磬之日多乏見糧將便公私宜從斂散卿等名
登庶老業守先疇各勉農人以副朕意所謝知

批李夷簡賀御撰君臣事跡屏風表

唐白居易

朕思求理化親閱典墳至於去邪納諫之規勤政
慎兵之誠取而作鑒書以爲屏與其散在圖書心
存而景慕不若列之繪素目覩而躬行庶將爲後
事之師不獨觀古人之象卿詞彰恭順義見忠規
省覽再三深叶朕意所賀知

賜賢妃苗氏陳讓恩命第三表不允斷來章

批答

宋歐陽脩

省所三上表陳讓賢妃事具悉妃嬪之制秩叙著
於王宮爵賞之行名數存乎國典舉必謀衆予其
敢私眷柔閒淑慎之賢有輔佐憂勤之德更歲時
而維舊列號位以旣隆屬者因築館之將行示緣
恩而推寵雖朕心之乃眷必廷論之曰然而能恪
執謙冲深形懇避然而讓宜有節禮不越於再三
命出維行告已申於中外往祇休渥毋或固辭所
讓宜不允仍斷來章付賢妃苗氏

賜皇弟奉寧軍節度使華原郡王允良讓恩

命第一表不允批答 宋歐陽脩

朕合食祖考以昭孝推恩宗族以展親所以厚人倫明教愛卿以近屬肅然在庭能盡志以脩容不違禮而終事方慶典之均洽宜寵章之所先好謙之懷雖可嘉尚已出之命其往欽承

賜新除宰臣富弼讓恩命不允批答 宋仁宗

宋歐陽脩

省表具之卿有憂國愛君之心而忠以忘其已有經邦濟時之學而用未究其能夫畜久而積厚則施之不窮慮深而計熟則謀無不獲茲朕所以慮

心及席有望於卿也矧卿正直不回庸邪素忌小人所異君子所同是以在外十年而左右之譽不及履躬一德而縉紳之望愈隆朕內決於心外詢于衆敢謂有得卿其何辭所讓宜不允仍斷來章

按此篇宋文鑑以為歐陽脩作而今王安石集中亦有之不知何謂然校其詞小豈當時脩歟其所不安石又轉為之代筆

賜新除叅知政事程戡讓恩命不允斷來章

批答

宋歐陽脩

省表具之朕有欲治之心而甚勞思底治之方而未獲夙夜于此唯賢是求卿出入宣勤材望兼著

誠明發於事業識慮可以詢謀而召自外邦叅于宰府朕志所定其何可移夫任之重者憂實深遇之隆者報亦厚讓而後受雖敦難進而可嘉知無不為其一乃心而圖效所讓宜不允仍斷來章

賜樞密使宋庠讓恩命第二表不允斷來章

批答

宋歐陽脩

省表具之卿蘊純和端慤之誠富敏瞻通明之學維時舊德實我柄臣當祀事之有成廣慶恩而方洽疇其封爵錫以號名茲為寵章蓋舉常典無煩避讓其往欽承所讓宜不允仍斷來章

賜右僕射范純仁辭免恩命不允批答

宋蘇軾

自昔先帝之世屢歎材難及朕嗣位以來專用德選雖爵祿名器出於獨斷而長育成就實在羣公長短不遺輔相之責苟無為國養人之意必有臨事乏使之憂朕用慨然當食不御思得英雋之老共收文武之用維卿篤於憂國明於知人灼見朕心宜在此位往任天下之重毋事匹夫之廉

賜新除宣徽北院使檢校太保判并州王拱辰讓恩命不允仍斷來章批答

宋歐陽脩

省表具之宣導徽猷號為近職鎮撫方面實維難才予思其人於爾為得至於儒學雍容於顧問勤勞出入於劇繁考資望以孰先在甄陞而維允辭讓之節誠雖可嘉詢謀既同命則無易所讓宜不允仍斷來章

賜鎮海軍節度使檢校太尉同中書門下平

章事判亳州陳執中讓恩命第二表不允仍

斷來章批答

宋歐陽脩

卿自再司鈎軸未久歲時乃者數上封章願還印

綬朕惟委任之際古今所難知之不盡如不知用之不終如不用所以悉格羣議獨斷余衷非唯勉爾以胡恤人言亦庶幾乎任賢勿貳之意也而卿避讓之節再三益堅事有重違理當俯徇夫進退以禮豈唯優大臣堂陛俱隆蓋以尊人主是用寵爾以節旄之寄兼之以槐鼎之榮雖為新恩實爾舊物出入中外載嘉夙夜之勤待遇始終當盡君臣之分無煩封執用體眷懷所讓宜不允仍斷來章

賜宰臣富弼乞退不允批答

宋歐陽脩

省表具之夫知人之明可謂難矣而任賢之術茲豈易哉若乃聽之不聰信之不篤施設之方未盡弗極其材遲速之效有時莫能少待則被其任者實亦難歟卿以純一忠亮之誠蘊宏遠深大之業朕虛已以聽推心仰成至於一二之臣是維同德下逮衆多之論曾靡間然方將甄叙賢愚脩明法度務究本根而吏治不求歲月之近功期於有成茲乃予意柰何中道而將止夫亦奚託以為辭矧上下既交寧有不通之志而君臣相遇豈為易得

之時當體予懷勉安厥位所乞宜不允

賜宰相呂公著上第一表乞致仕不許批答

宋蘇軾

覽表具之卿三世將相一時著龜不求備以取人則房喬之比其經遠而無競有謝安之風用能寧輯我家靖共爾位政在元老人無異詞胡為厭事而求歸不復為國之長慮方今官冗財匱歲艱民貧天步難安國是未定若方勤於樸斲而遽易於工師人其謂何勢必不可告老之請吾未欲聞

賜太師文彥博上第一表乞致仕不允批答

宋蘇軾

省表具之卿之求去蓋數矣言不為不切而朕終莫之從朕之留卿亦至矣禮不為不盡而卿終莫之亮君臣之際情不相喻朕甚疑之夫樂丘園而厭軒冕亦古人之一節而非聖賢之高致尊者老以重朝廷蓋天下之大計而非冲人之私欲與其使朕屈公議以從卿曷若卿少貶其私意以徇天下乎

賜觀文殿學士尚書右丞田况乞致仕不允批答

宋歐陽脩

省表具之卿德量足以容衆材識足以濟時蔚然君子之風綽有大臣之體自嬰疾恙求解樞機朕心惻然深以為惜乃惟書殿之清職自非耆哲而弗居俾從優游以便頤養所期福善之理當蒙勿藥之休還來輔予以盡賢業遽形引謝良異眷懷所乞宜不允

賜新除檢校太尉守司空依前開府儀同三司致仕韓絳辭免恩命不允批答

宋蘇軾

國家尊異耆老砥礪廉隅凡致為臣必厚其禮而

况卿出入四世師表萬民身任安危位兼將相求
惟三宗眷遇之重宜極一品褒崇之榮成命既孚
僉言維允宜從中外之望罔徇謙冲之私

御札

按字書札小簡也天子之札稱御札尊之也古
無此體至宋而後有之其文出於詞臣之手而
體亦不同大抵多用儷語蓋勅之變體也今採
數首列于篇

古體

賜崔與之御劄

宋理宗

卿年高德邵國之望也朕親政以來渴想尤切虛
天官以俟游覽奏牘奚辭之確邪朕惟寡昧冀揚
前烈當勉爲朕起以副圖任之意書不云乎尚猶
詢茲黃髮則罔所愆此朕惓惓於卿者眷然有懷
其趣讀曰就道勿復引辭

俗體

熙寧

神宗年號

元年南郊御札

宋王珪

有天下者莫重上神之報爲人子者莫嚴宗廟之
承率躬三歲之祠常候一陽之應緬慕先聖光施

冲人載循裡類之期適在諒陰之際大懼不能備
飭儀物奉將筮盛於是刺六經之文傳博士之議
皆以謂喪有以權而順變祭無以卑而廢尊矧稽
參西漢之彝浴用景德真宗年號之制顧予涼菲賴帝
臨遂卜天正之辰往脩郊見之禮方且進祈茂
祉以大庇黎元昭格至精以終圖熙事庶幾能饗
其敢憚勤朕以今年十一月十八日有事于南郊
咨爾攸司各揚厥職諸道州府不得以進奉爲名
輒行科率其百司除事神之物並宜一切仍舊外
餘應干供奉所須務令淳約以稱朕不忘孝思之

義

熙寧四年大饗明堂御札

宋元絳

勅内外文武臣寮等朕荷二儀之休履四海之富
經庶政之至治秩將禮之彌文欽維五聖之常
躬三載之祀自續隆於大業已肆類於圓丘言
總章未詔嘉饗維仁祖之武宜謹於遵脩維考
之尊宜嚴於陟配况萬寶時楹三光仰澄官師協
恭方夏底定是用稽仍路寢之制涓選肅霜之辰
上以裒對天明展昭事之重下以敕厲民志示追

養之勤特戒先朝以孚大號朕取今年李秋擇日
有事于明堂其今年冬至更不行南郊之禮所有
合行諸般恩賞並特就祀明堂禮畢一依南郊例
施行至日朕親御宣德門宣制咨爾攸司各揚厥
職諸道州府不得以進奉為名輒行利率務循典
故無致煩勞

大慶殿恭謝御札

宗仁

宋歐陽脩

勅内外文武臣寮等執珪璧以事神嚴祖宗而配
帝雖有國之常典亦因時而制宜朕承三聖太祖太宗
真之丕基撫萬邦之有衆儉于已使天下之民豐

勞于心致天下之民佚罔敢怠忽庶幾治平而首
春以來偶爽調適賴三靈敷祐百福來臻順以節
宣獲茲康裕加以邊隅不聳風雨以時雖庶物之
咸和顧眇躬之增惕是用稽先朝之成憲詢故實
於有司即廣殿之翼嚴擇靈辰之良吉式伸昭謝
以格純休宜示先期俾茲誕告朕取今年至和九
月內於大慶殿行恭謝之禮其今年冬至親祀南
郊即宜權罷所有合行諸般恩賞並特就恭謝禮
畢一依南郊例施行至日朕親御宣德門宣制仍
令所司詳定儀注以聞務遵典禮勿俾煩勞咨爾

多方咸體予意故茲札示想宜知悉

賜崔與之御劄

宋理宗

卿允文允武善斷善謀簡自朕心爰立作相縉紳
交賀中外均懽亟令帥臣以禮導發申飭專使齎
詔趣讀曰促行既側席以待賢宜脂車而就道胡屢
稱於耄老謂莫任於驅馳昔衛國武公百歲猶勤
於箴儆而我朝彥博姓文九十尚總於平章矧卿力
則弗衰年猶未及盍副四方之望不遠千里而來
共圖事功以安社稷豈特卿有無窮之聞去聲抑使
邦其永孚于休

赦文

德音附

按字書云赦者舍也肆赦之語始見虞書而周
禮司刺掌三赦之法呂刑有疑赦之制則或以
其情之可矜或以其事之可疑或以其人在三
赦三宥八議之列是以赦之非不問其情之淺
深罪之輕重而槩赦之也後世乃有大赦之法
於是為文以告四方而赦文興焉又謂之德音
蓋以赦為天子布德之音也然考之唐時戒勵
風俗亦稱德音則德音之與赦文自是兩事不
當強而合之也今各仍其稱以附赦文之後而

著其說如此俟博聞者辯焉

古體

幸蜀赦文

唐玄宗

朕以薄德嗣守神器每乾乾惕厲勤念生靈一物失所無忘罪已聿來四紀人亦小康推心于人無疑于物而姦臣兇豎棄義背恩割剝黎元擾亂區夏皆朕不明之過也今巡撫巴蜀訓厲師徒仍令太子諸王蒐兵重鎮誅夷兇醜以謝昊穹思與羣臣重弘理道可大赦天下

春初大赦文

唐德宗

朕以菲薄託於王公之上恭承天地之序虔奉祖宗之訓遐想至理思臻太和而誠不感物化不柔遠聲教猶鬱征賦仍繁頃者務於安人不憚屈已與西蕃結好申以齊盟而戎心不戢背義虧信劫脅士庶屢犯封疆元元何辜皆朕之失乃者輦轂之下兇狂結構上帝垂祐悉自伏誅刑以止殺諒非獲已今三陽布和萬物資始思與羣公兆庶維新政理宜敷在宥之澤以覃作解之恩可大赦天下大辟已下罪咸赦除之

俗體

登極赦文

唐玄宗

朕承累聖之洪休荷重光之積慶昔因多難內屬
構屯寶位深墜地之憂神器有綴旒之懼事殷家
國義感神祇吟嘯風雲龔恭行雷電致君親於堯
舜濟黔首於休和遂以孟秋允昇儲貳旋承內禪
繼體宸居拜手之請空勤讓立之誠莫展恭臨億
兆二載于茲上稟聖謨下凝庶績八荒同軌瀛海
無波不謂姦慝潛謀蕭牆竊發逆賊竇懷貞等並
以庸妄權齒朝廷毫髮之効未申丘山之疊仍積
共成梟獍將肆姦回太上皇睿聖斷宏通英謀獨

運命朕率岐王範薛王業等躬事誅鋤齊斧一麾
凶渠盡殪太陽朗耀澄氛霽於天衢高風順時厲
肅殺於秋序神靈協贊夷夏相歡四族之慝既清
七日之祥方永爰承後命載闡休期總軍國之大
猷施雲雨之鴻澤承乾之道旣光被於無垠作解
之恩思式覃於品物當與億兆同此維新可大赦
天下大辟罪已下咸赦除之加邠王守禮實封三
百戶宋王成器申王成義各加實封一千戶岐王
範薛王業各加實封七百戶文武官三品已下賜
爵一級四品以下各加一階內外官人被諸道按

三書月苑卷三十一
察使及御史所摘伏咸宜洗滌選日依次叙用

永泰改元大赦文

唐代宗

協五紀者建號以體元授四時者布和而順氣天心可見人欲是從爰立大中之道式受維新之命朕嗣膺下武獲主萬方顧以薄德乘茲艱運戎麾問罪今已十年飲至策勳惟凶渠之授首勞師黷武豈人主之用心軍役屢興干戈未戢茫茫士庶斃于鋒鏑皇穹以朕爲子蒼生以朕爲父至德不能被物精誠不能動天俾我生靈淪於溝壑非朕之咎孰之過歟朕所以馭朽懸旌坐而待曙勞懷

罪已之念延想安人之策亦維羣公卿士百辟庶寮咸聽朕命協宣乃力履清白之道還淳素之風率是黎元歸于仁壽君臣一德何以尚茲迺者刑政不脩惠化未洽既盡財力良多抵犯靜惟哀矜日軫于懷今將大振綱維益明懲勸肇舉改元之典弘敷在宥之澤可大赦天下改廣德三年爲永泰元年

奉天改元大赦文

德宗

唐陸贄

門下致理興化必在推誠忘已濟人不悞改過朕嗣服丕構君臨萬方一作失守宗祧越在草莽不

念率德誠莫追於既往永言思咎期有復於將來
明徵厥初以示天下維我烈祖邁德庇人致俗化
於和平拯生靈於塗炭重熙積慶垂二百年伊爾
卿尹庶官洎億兆之衆代受亭育以迄于今功存
于人澤反一作垂於後肆予小子獲纘鴻業懼德不
嗣罔敢怠荒然以長於深宮之中暗於經國之務
積習易溺居安忘危不知稼穡之艱難不察征伐
之勞苦澤靡下究情不上通事既壅隔人懷疑咀
猶昧省已遂用興戎徵師四方轉餉千里賦車籍
馬遠近騷然行齋居送衆庶勞止或一日屢交鋒

刃或連年不解甲胄祝奠乏主室家靡依死生流
離怨氣凝結力役不息田萊多荒暴命峻於誅求
疲吐空於杼軸轉至溝壑離去鄉閭邑里丘墟人
煙斷絕天譴於上而朕不寤人愁於下而朕不知
馴致亂階變與都色賊臣乘豐肆逆滔天曾莫愧
畏敢行凌逼萬品失序九廟震驚上辱於祖宗下
負於黎庶痛心覩貌罪實在予永言愧悼若墜淵
谷賴天地降祐人神協謀將相竭誠爪牙宣力屏
逐一作除大盜載張皇維將弘永圖必布新令朕晨
與夕惕惟念前非乃者公卿百寮累抗章疏猥以

徽號加于朕躬固辭不獲俯遂輿議昨因內省良用矍然體陰陽不測之謂神與天地合德之謂聖顧惟淺昧非所宜當文者所以化成武者所以定亂今化之不被亂是用興豈可更徇羣情苟膺虛美重予不德祇益懷慙自今以後中外所上書奏不得更稱聖神文武之號夫人情不常繫於時化大道既隱亂獄滋豐朕既不能弘德導人又不能一法齊衆苟設密網以羅非辜爲之父母實增愧悼今上元統曆獻歲發生宜革紀年之號式敷在宥之澤與人更始用答天休可大赦天下改建中

五年爲興元元年自正月一日昧爽已前大辟罪已下罪無輕重咸赦除之李希烈田悅王武俊李納等有以忠勞任膺將相有以勲舊繼守藩維朕撫馭乖方信誠靡著致令疑懼不自保安兵興累年海內騷擾皆由上失其道下罹其災朕實不君人則何罪屈已弘物予何愛焉庶懷引慝之誠以洽好生之德其李希烈田悅王武俊李納及所管將士官吏等一切並與洗滌各復爵位待之如初仍即遣使分道宣諭朱滔雖與賊泚連坐路遠未必同謀朕方推以至誠務欲弘貸如能效順亦與

維新其河南河北諸軍兵馬並宜各於本道自固
封疆勿相侵軼朱泚大爲不道棄義蔑恩反易天
常盜竊名器暴犯陵寢所不忍言獲罪祖宗朕不
敢赦其應被朱泚脅從將士官吏百姓及諸色人
等有遭其扇誘有迫以兇威苟能自新理可矜宥
但官軍未到京城以前能去逆効順及散歸本道
者並從赦例原免一切不問天下左降官即與量
移近處已量移者更與量移流人配隸及藩鎮効
力并緣罪犯與諸使驅使官兼別勅諸州縣安置
及得罪人家口未得歸者一切放還應先有痕累

禁錮反逆緣坐承前恩赦所不該者並宜洗雪亡
官失爵放歸勿齒者量加收叙人之行業或未必
真構大廈者方集於羣材建竒功者不限於常檢
苟在適用則無棄人况黜免之徒沈鬱既久朝過
夕改仁何遠哉流移降黜亡官失爵配隸人等有
材能著聞者特加錄用勿拘常例諸軍使諸道赴
奉天及進收京城將士等或百戰摧敵或萬里勤
王扞固金城毆除大憝濟危難者其節著復社稷
者其業崇我圖爾功特加彝典錫名疇賦永永無
窮宜並賜名奉天定難功臣身有過犯遞減罪三

等子孫有過犯遞減罪二等當戶應有差科使役一切蠲免其功臣已後雖衰老疾患不任軍旅當分糧賜並宜全給身死之後十年仍回給家口其有食實封者子孫相繼代代無絕其餘叙錄及功賞條件待收京日並准去年十月十七日十一月十四日勅處分諸道諸軍將士等久勤扞禦累著功勳方鎮克寧維爾之力其應在行營者並超三資與官仍賜勳五轉不離鎮者依資與官賜勳三轉其累加勳爵仍許回授周親内外文武官三品以上賜爵一級四品以下各加一階仍並賜勳兩

轉見危致命先哲攸貴掩骼埋胔禮經所先雖效用而或殊在惻隱而何間諸道將士有死王事者各委所在州縣給遞送歸本管官爲葬祭其有因戰陣殺戮及擒獲伏辜暴骨原野者亦委所在逐近便收葬應緣流貶及犯罪未葬者並許其家各據本官品以禮收葬自頃軍旅所給賦役繁興吏因爲姦人不堪命咨嗟怨苦道路無聊汙可小康與之休息其墊陌及稅間架竹木茶漆摧鐵等諸色名目悉宜停罷京畿之內屬此寇戎攻劫焚燒靡有寧室王師仰給人以重勞特宜減放今年夏

三十一
赤文
三十四
稅之半朕以兇醜犯闕遽用于征爰度近郊息駕
茲邑供儲克辦師旅攸寧式當褒旌以志吾過其
奉天宜升爲赤縣百姓並給復五年尚德者教化
之所先求賢者邦家之大本求言茲道夢想增懷
而澆薄之風趨競不息幽棲之士寂寞無聞蓋誠
所未孚故求之不至天下有隱居行義才德高遠
晦跡丘園不求聞達者委所在長吏具名聞奏當
備禮邀致諸色人中有賢良方正能直言極諫及
博通墳典達於教化并洞識韜鈴堪任將帥者委
常叅官及所在長吏聞薦天下孤老鰥寡惇獨不

能自活者並委州縣長吏量事優卹其有年九千
已上者刺史縣令就門存問義夫節婦孝子順孫
旌表門閭終身勿事大兵之後內外耗竭貶食省
用宜自朕躬朕當節乘輿之服御絕宮室之華飾
率已師儉爲天下先諸道貢獻自非供宗廟軍國
之用一切並停應內外官有冗員及百司有不急
之資委中書門下即商議條件停減聞奏布澤行
賞抑維舊章今以餘孽未平帑藏空竭有乖慶賜
深愧于懷赦書有所未該者所司類列條件聞奏
敢以赦前事相言告以其罪罪之亡命山澤挾藏

文獻通考卷三十一
軍器百日不首復罪如初赦書日行五百里布告
遐邇咸使聞知

夏月赦文

唐代宗

躋於道者化淳而刑措善於理者網舉而網疎朕
涉道未弘燭理多昧常亦遐想太古高挹玄風保
合太和在宥天下蓋德薄而未臻也是用因時以
設教便浴以立防務盡平恕用申哀卹又化濺而
多犯也加以邊虞未戢徭賦適繁荒廢之際寇攘
斯起遂令園王嘉石之下積有繫囚竹章牙簡之
中困於吏吏屬盛陽之候大暑分蒸仍念狴牢何

堪鬱灼所以汨傷和氣感致咎徵天道人事豈相
遠也如聞天下諸州或憊時雨首種不入宿麥未
登哀我矜人何時不恐皆由朕過益用懼焉惕然
憂嗟深自咎責所以減膳徹樂別居齋宮禱於神
明冀獲嘉應仲夏之月靜事無爲以助晏陰以弘
長養斷薄決小已過於麥秋繼長增高宜順乎天
意可大赦天下見禁囚徒罪無輕重一切釋放

旱蝗赦文

唐懿宗

動天地者莫若精誠致和平者莫若脩政朕顧惟
庸昧託于王公之上于茲十一年矣祇荷丕構寅

畏小心慕唐堯之欽若昊天遵周王之昭事上帝
念茲夙夜靡替虔恭同馭朽之憂勤思納隍之軫
慮內戒奢靡外罷畋遊匪敢期於雍熙所自得於
清淨止望寰區無事稼穡有年然而燭理不明涉
道維淺氣多堙鬱誠未感通旱暵是虞蟲螟爲害
蠻蜚未賓於遐裔寇盜復蠹於中原尚駕戎車益
調兵食俾黎元之重困每宵旰而忘安今盛夏驕
陽時雨久曠憂勤兆庶旦夕焦勞內脩香火以虔
祈外罄牲玉以精禱仰俟玄貺必致甘滋而油雲
未興秋稼闕望因茲愆亢軫于誠懷矧復暴政頽

刑強官酷吏侵漁蠹耗陷害孤熒致有冤抑之人
構災沴之氣主守長吏無忘奉公伐叛興師蓋非
獲已除奸討逆必使當辜苟或陷及平人自然風
雨愆候凡行營將帥切在審詳昭示惻憫之心敬
聽勤卹之旨應京城天下諸州府見禁囚徒除十
惡忤逆官典犯賊故意殺人合造毒藥放火持伏
開劫墳墓及關連徐州逆黨外並宜量罪輕重速
令決遣無久繫留雷雨不同田疇方瘁誠宜愍物
以示好生其京城未降雨間宜令坊市權斷屠宰
昨陝虢中使迴方知蝗旱有損處諸道長吏分憂

共理宜各推公共思濟物內有饑歎切在慰安哀
此蒸人毋俾艱食徐方寇孽未殄師旅有征凡合
誅鋤審分淑慝無令脅從橫死元惡偷生宜申告
伐之文使知逆順之理於戲每思禹湯之罪已其
庶成康之措刑孰爲德信未孚教化猶摠咨爾多
士俾予一人旣引過在躬亦漸幾于理布告中外
稱朕意焉

立皇太子赦文

唐順宗

維先王光有天下必正我邦本以立人極建儲貳
以承宗祧所以啓迪大猷安固洪業斯前代之令

典也皇太子某

純

體仁秉哲恭敬溫文德協元良

禮當上嗣朕奉若不訓憲章前式惟承社稷之重

載考春秋之義授之七鬯以奉粢盛爰以令辰俾

膺茂典今冊禮云畢感慶交懷思與萬方同其惠

澤自貞元二十一年二月二十四日已後至四月

九日昧爽已前天下應犯死罪者特降從流流以

下遞減一等文武常叅并州府縣官子爲父後者

賜勳兩轉古之所以教太子必茂選師傅以翼輔

之法於訓詞而行其典禮左右前後罔非正人是

以教諭而成德也給事中陸質中書舍人崔樞積

學懿文守經據古夙夜講習庶協于中並充皇太子侍讀天下孝子順孫先旌表門閭者委所管州縣各加存卹

元豐

神宗年號

立皇太子赦文

宋鄧潤甫

父子一體也維立長可以圖萬世之安國家大器也維建儲可以係四海之望位序蚤定而人莫不以爲悅典禮亟崇而衆罔敢以爲私永惟上嗣之賢寔有妙齡之譽入而視膳孝友見於夙成出則好書聰哲繇於自得粵紹休於正統循虛位於東

朝迺考著龜之占迺稽方冊之實載涓吉日肇闢青宮周家先親不敢忘廟社之重夏后與子蓋以順天人心宜覃曠恩徧暨羣品可大赦天下於戲離明震長縣帝緒於億年解吉渙亨灑天仁於萬物蓋禮之所行者大則澤之所流者深咨爾多方體朕至意

蝗蟲避正殿降免囚徒德音文

德宗

唐陸贄

夫人事失於下則天變形於上咎徵之作必有由然自去歲已來災沴仍集雨澤不降延歷三時蟲

蝗既臻彌亘千里穀糴翔貴稼穡卒瘁嗷嗷烝人聚泣田畝興言及此實所痛傷徧祈百神曾不獲應方悟禱祀殊救患之術言詞非謝譴之誠憂心如焚深自刻責得非刑法舛謬忠良鬱堙暴賊未蠲勞師靡息事或無益而重爲煩費任或非當而橫肆侵蝨有一於茲足傷和氣本其所以罪實在予百姓何辜重罹殍餒所宜出次賑食節用緩刑側身增脩以謹天戒朕避正殿不御百寮奏事並於延英處分尚食進膳宜更節減百司不急之務一切且除諸軍將士外自餘應食官糧人及諸色

用度等並委本使長官商量權行停減以救荒饑仍限十日內具元額及所釐革條件聞奏待至豐稔却令依舊畿內百姓委京兆尹切加慰撫除正稅正役外徵科差遣並宜禁絕非交相侵奪尋常訴訟不須追擾務且息人京畿內外及京兆府諸縣見禁囚徒死罪降從流以下一切放免畿內及河中同州界應有因戰陣殺戮遺骸暴露者各委所在長吏隨事埋瘞咨爾卿佐實維股肱所當一其誠心同恤災患勉脩厥職副我憂勤右占體

西京奉安神宗皇帝御容禮畢德音

宋蘇軾

門下朕以寡昧仰繼聖神顧瞻山陵未忘弓劍之
慕益廣宗廟以奉衣冠之游祇遣輔臣往嚴像設
啟鳳臺之仙宇燦龜洛之仁祠晬表一臨陪京增
重山川改色方貢祥而效珍父老縱觀或太息而
流涕宜施雷雨之澤以答神人之心於戲好生育
物既推文母之慈崇德措刑終成神考之志咨爾
有衆宜體朕懷

戒勵風俗德音文 穆宗 唐元稹

朕聞昔者卿大夫相與讓於朝士庶人相與讓

於齒周成王刑措不用漢文帝恥言人過真理古
也朕甚慕焉中代以還爭端斯起掩抑其言則專
蔽誘掖其說則欺誣自非責實循名不能彰善癉
惡故孝宣必有敢告乃下光武不以詭辭遽行語
稱訕上之非律有匿名之禁皆所以防三至之毀
重兩造之明是以爵人於朝則皆勸刑人於市則
皆懼罪有歸而賞有事也末俗偷巧內荏外剛卿
大夫無進思盡忠之誠多退有後言之謗士庶人
無切磋琢磨之益多銷鑠浸潤之讒進則諛言諂
笑以相求退則羣居狎處以相識留中不出之請

益發其陰私公論不容之詞實生於朋黨擢一官
則曰恩皆自我黜一職則曰事出他門比周之跡
已彰尚矜介特由徑之蹤盡露自謂貞方居省寺
者不能以勤恪蒞官而曰務求簡易提紀綱者不
能以準繩檢下而曰密奏風聞獻章疏者更相是
非備顧問者互有憎愛苟非秦鏡照膽堯羊觸邪
時君聽之安可不惑參斷一謬俗化益訛禍發齒
牙言生枝葉率是道也朕甚憫焉我國家貞觀太宗
年號開元年號同符三代風俗歸厚禮讓並行兵興
已來久矣姑欲導之以德不欲毆之以刑然

而信或未孚理有未至曾無恥格益用彫刻小則
綜覈之權見侵於下輩大則機密之重旁撓於薄
徒尚念因而化之亦既去其尤者而宰臣等懼其
寢染未克澄清備引祖宗之書願垂戒勵之詔遂
申教告頗用殷勤各當自省厥躬與我同底于道
凡百多士宜體朕懷以上俗體

鐵券文

按字書云券約也契也劉熙云綬也相約束繾
繾以爲限也史稱漢高帝定天下大封功臣剖
符作誓丹書鐵券金匱石室藏之宗廟其誓詞

曰使黃河如帶泰山若礪國以永存爰及苗裔
後世因此遂有鐵券文焉其文諸集不載獨陸
贄有之然以安反側之心非錫券之本指也今
姑錄之以備一體

賜李納田悅王武俊鐵券文

德宗

唐陸贄

維興元元年歲次甲子正月癸酉朔二日甲戌皇
帝咨爾某官某嗚呼王一作君者所以撫人失於所
撫則叛下者所以奉上垂於所奉則刑各當其理
德用不擾各違其分亂於是生朕德薄化淺昧於

君道罔知省已姑務責人是以徵師徂征連歲靡
息維爾以誠志之不達反反于厥衷阻衆與戎結
豐拒守豈非上失其所撫而下失於所奉歟書曰
萬方有罪罪在朕躬我實不德兆民何咎俾廢其
生業離其室家陷於困窮死於戰陣老病廢其一作失
養孤惻靡依怨結蒼生一作昊感傷和氣朕爲人父
母得不愧於心哉晨興以思夕惕以悼粵自嗣位
迄今六年一作載天將悔禍朕方覺寤爾亦知衆心
之厭亂思所以保安協於朕懷若應符契非天地
合德人神合謀將茂育羣生則何以臻此朕是用

上順天意俯從人心滌爾疵瑕復爾爵位坦然靡阻君臣如初功載鼎彝名藏王府子孫代代爲國勲臣河山帶礪傳祚無絕朕方布大信承天子人若食其言何以享國於戲其祇若明命用保無疆之休

賜安西管內黃姓燾官鐵券文

德宗

唐陸贄

維貞元二年歲次丙寅八月丁巳朔三日己未皇帝若曰咨爾四鎮節度管內黃姓燾官驃騎大將軍行左金吾衛大將軍員外置同正員兼試太常

卿頓啜護波支維爾乃祖乃父代服聲教勤勞王家勲書于鼎彝族列于藩籍爾克紹先祖之烈而重之以忠貞嗣守職官祇若朝化率其種落保我邊陲丹誠向化萬里如近是用稽諸令典錫以券書若金之堅永代無變子孫繼襲作我藩臣爾其欽承勿替休命

諭祭文

按諭祭文者天子遣使下祭之詞也或施諸宗室妃嬪以明親親或施諸勲臣大臣以明賢賢而示君臣始終之義自古及今皆用之蓋王言

之一體也故今採而錄之若其他臣庶相祭之
文則別為一類云

皇叔故魏王下事祭文

宋蘇軾

維靈出就外邸二年于茲一日不見企予望思矧
此告終月逝日遠雖云近郊寧復旋返築室祠宮
既固既定雖非未歸亦可少安嗚呼哀哉

故贈濮王允讓十月三十日下事祭文

宋歐陽脩

維靈稟德甚茂享年不遐余心所哀卹典斯備往

即安宅享茲克誠以上宗室

祭故贈婕妤孟氏文憲宗

唐白居易

維元和二年歲次丁亥十二月甲寅朔十九日壬
申皇帝遣某官某以庶羞之奠致祭于故婕妤之
靈曰惟爾和順積中柔明奉上動靜合肅雖之體
進退得婉變之儀選自良家備茲內職脩令顏以
顧德蘭幽有香守明節而保身玉潔無玷方資懿
範以茂嘉猷彼美有聞于何不淑遽茲淪逝深用
惻傷既卜日晨爰申奠酌以爾有班氏之明智故

贈以婕妤以爾有宓妃之姿容故葬於洛浦魂兮
不昧歆此誠懷尚饗

故秦晉國夫人祭文 宋歐陽脩

維靈蔚有令儀著于茂則顧追褒之寵數已極恩
榮念永闕於佳城載深惻怛列茲奠禮用慰管魂
以上
妃嬪

祭薛濬文

隋文帝

皇帝咨故考功侍郎薛濬於戲維爾操履貞和器
業詳敏允膺列宿勤蹇克彰及邁私艱奄從毀滅
嘉爾誠孝感於朕懷奠酌有加抑維朝典故遣使

人指申往命魂而有靈歆茲榮渥嗚呼哀哉

祭吳少誠文

憲宗

唐白居易

維元和五年歲次庚寅二月辛未朔二日壬申皇
帝遣內侍省內府局丞賜緋魚袋孫士攻以清酌
庶羞之奠致祭于故彰義軍節度使贈司徒吳少
誠之靈曰惟爾武毅挺質韜鈴拔身負勇果之雄
材蓄變通之明識自察廉列郡節制成師貞且有
為勤而不擾軍戎輯睦封域底寧從義而致誠伏
順而保福既延寵渥方茂輝榮遽此幽淪深用傷
悼逝波不捨去日苦多想松楸以軫懷聞鼓鼙而

興歎恩加遣奠禮舉褒崇念爾有靈知予此意尚饗

贈保順軍節度使張惟吉祭文

宗仁

宋歐陽脩

維至和二年歲次乙未三月己未朔皇帝遣入內
內侍省內西頭供奉官向當延福宮康為政致祭
于贈保順軍節度使張惟吉之靈維靈忠勤之節
克保於有終存歿之恩備隆於異數仍加祖奠式
表哀榮尚饗

以上
臣工

祭迴鶻可汗文

穆宗

唐白居易

維長慶元年歲次辛丑月日皇帝遣使朝議大夫
檢校右散騎常侍兼少府監御史大夫雲騎尉賜
紫金魚袋裴通致祭于故愛登羅汨沒密施毗伽
保義可汗之靈粵以英武之姿雄奇之策撫有九
姓制臨一方氣吞諸戎名播上國况能嚮風納款
繼好息人代為親鄰歲入職貢方賴威畧共清寰
瀛倚為長城求固中夏而天殲驕子國喪名王奪
氣色於陰山實精光於昴宿凶計云至悲懷用深
故遣使臣往將國命展弔奠之禮申哀榮之恩猶
有明靈當鑒誠意尚饗

祭咸安公主文

憲宗

唐白居易

維元和三年歲次戊子三月癸未某日皇帝遣某
 官某以庶羞之奠致祭于故咸安大長公主觀瀾
 毗伽可敦之靈曰惟姑柔明立性溫惠保身靜脩
 德容動中規度組紉之訓既習於公宮湯沐之封
 遂開於國邑及禮從出降義重和親承渥澤於三
 朝播芳猷於九姓遠脩好信既申協比之姻殊仁
 保和實賴肅雍之德方憑福履以茂輝榮宜降永
 年遽歸長夜悲深訃告寵極哀榮爰命使臣往申
 奠禮故鄉不返烏孫之曲空傳歸路雖遙青塚之

魂可復遠陳薄酌庶鑒悲懷嗚呼尚饗

以二夷狄

國書

按國書者鄰國相遺之書也春秋列國各有詞
 命以通彼此之情而其文務協典禮從容委曲
 高卑適宜乃為盡善觀鄭人詞命迭更四手國
 賴以存良有以也漢唐而下國統雖一而夷狄
 內通故其往來亦用之乃有國之所不可廢者
 也但左傳所載列國應對之詞皆出口傳例不
 得錄獨呂相絕秦豐贍闕闊似非口語能悉意
 必當時筆而授之故錄其詞并後代諸作列焉

使吕相魏錡告絕秦 晉厲公

秦桓公既與晉厲公為令狐之盟而又召狄與楚欲道以伐晉故晉使人絕之

昔逮我獻公及穆公相好戮力同心申之以盟誓

重之以婚姻穆公娶獻公之女天禍晉國文公如齊惠公

如秦辟驪也無祿獻公即世穆公不忘舊德俾我惠

公用能奉祀于晉秦納惠公又不能成大勳而為韓之

師秦伐晉獲惠公亦悔于厥心用集成也我文公是穆之成

也成功於晉文公躬擐甲胄跋草行也履山川踰越險阻

征東之諸侯虞夏商周之胤而朝諸秦則亦既報

舊德矣鄭人怒君之疆場我文公帥諸侯及秦圍

鄭晉自以鄭貳於楚故圍之鄭非侵秦也晉以此誣秦耳秦大夫不詢於我

寡君擅及鄭盟盟者秦伯謙言大夫諸侯疾之將致命于秦

而討秦文公恐懼綏靜諸侯秦師克還無害則是

我有大造成功于西也無祿文公即世穆為不弔不見

弔傷蔑死我君寡也我襄公迭我殺地奸絕我好伐

我保城此亦秦証殄滅我費滑滑國都於費散離我兄弟撓

亂我同盟滑晉同姓傾覆我國家我襄公未忘君之舊

勳納文公之勳而懼社稷之隕是以有殺之師猶願赦

罪于穆公晉欲求秦解於秦穆公弗聽而即楚謀我天誘其

衷成王隕命楚弑成王穆公是以不克逞志于我穆襄

即世康靈即位康公我之自出晉外又欲闕翦我

公室傾覆我社稷帥我螫賊以來蕩搖我邊疆秦納

公子我是以有令狐之役康猶不悛入我河曲伐

我涑川俘我王官翦我羈馬我是以有河曲之戰

東道之不通則是康公之絕我好也及君秦桓公

嗣也我君景公引領西望曰庶撫我乎君亦不惠

稱盟利吾有狄難路氏入我河縣焚我箕部芟夷我

農功虔劉皆殺也我邊陲我是以有輔氏之聚君亦

悔禍之延而欲徼福于先君獻穆使伯車秦桓公來

命我景公曰吾與女同好棄惡復脩舊德以追念

前勲言誓未就景公即世我寡君當作人是以有令

狐之會君又不祥背棄盟誓白狄及君同州君之

仇讎而我昏姻也白狄獲赤女納諸文君來賜命曰吾

與女伐狄寡君不敢顧昏姻君之威而受命于

吏君有二心於狄曰晉將伐狄應且憎言狄雖

實憎秦無信是用告我楚人惡君之

告我曰秦背令狐之盟而來出

上帝秦三公穆康共楚三王成伯莊

猶言余唯利是視不穀惡其出

懲不壹諸侯備聞此言斯是田成德是用宣之以

人寡人帥以聽命唯好是求君若惠顧諸侯矜哀寡人而賜之盟則寡人之願也其承寧諸侯以退其不能以諸侯退矣敢盡布之執事俾執事實圖利之按晉詞多誣秦本不足取持以其詳贍故錄之

賜尉佗書

漢文帝

趙佗初為南海尉後自立為南粵王又自尊號為南武帝乘黃屋左纛與中國侔文帝初立遣太中大夫陸賈使粵賜佗書曰

皇帝謹問南粵王甚苦心勞思朕高皇帝側室之子棄外奉北藩于代即此一語便道里遼遠壅蔽

樸愚未嘗致書高皇帝弃羣臣孝惠皇帝即世高后自臨事不幸有疾日進不衰以故諄再暴乎治諸呂為變故亂法不能獨制迺取他姓子為孝惠皇帝嗣賴宗廟之靈功臣之力誅之已畢朕以王侯吏不釋之故不得不立今即位乃者聞王遺將軍隆慮侯周書求親昆弟請罷長沙兩將軍朕以王書罷將軍博陽侯博陽侯有二陳濞周聚此所稱未知何人親昆弟在真定者已遣人存問脩治先人家按三事各從兼盡之道也前日聞王發兵於邊為寇災不止當其時長沙苦之南郡尤甚雖王之國庸獨利乎必多殺

士卒傷良將吏寡人之妻孤人之子獨人父母得一亡十朕不忍為也朕欲定地犬牙相入者以問吏吏曰高皇帝所以介也長沙土也朕不得擅變焉吏曰得王之地不足以為大得王之財不足以為富服領長沙南山名以南王自治之雖然王之號為帝兩帝並立亡一乘之使以通其道是爭也爭而不讓仁者不為也願與王分奔前患彼此共終今以來通使如故從今通使故使賈馳諭告王朕意王亦受之毋為寇災矣上褚以綿裝五十衣中褚三十衣下褚二十衣遺王願王聽樂娛憂存問鄰

國貢至南粵王恐乃頓首謝願

遺匈奴書二首參用史記

漢文帝

皇帝敬問匈奴大單于無恙按此冒頓使郎中係

虜淺遺朕書曰右賢王不請聽後義盧侯難氏等

計絕二主之約離兄弟之親漢以故不和鄰國不

附今以小吏敗約故罰右賢王使西擊月氏讀曰

盡定之願寢兵休士除前事復故約以安邊民世

世平樂朕甚嘉之此古聖王之志也漢與匈奴約

為兄弟所以遺單于甚厚昔約離兄弟之親者常

在匈奴然右賢王事已在赦前勿深誅單于若稱

書意明告諸吏使無負約有信敬如單于書使者

言單于自將伐國有功甚苦兵事服言天子自繡

袷綺衣袷者衣無絮也繡袷綺衣以繡為表綺為裏也長襦錦袍各一比

踈一之辨髮拂黃金飾具帶一黃金犀毗一胡帶之繡

十匹錦二十匹赤緋綠繒各四十匹使中大夫意

謁者令肩二人姓遺單于宋真德秀曰按此書先

在赦前勿深誅又云單于若能明告諸吏使無負

約然後可和使單于所言誠邪固不逆其善意使

遺之以物邪亦不墮其許謀抑揚開闔皆有法焉至

帝御夷狄之道矣

皇帝敬問匈奴大單于無恙按此老上使當戶沮

渠雕渠難當戶沮渠者一人為二郎中韓遼遺朕

馬二匹已至敬受先帝制長城以北引弓之國受

令單于長城以內冠帶之室朕亦制之使萬民耕

織射獵衣食父子毋離臣主相安俱無暴虐今聞

渫惡民貪降句其趨背義絕約忘萬民之命

離兩主之歡然其事已在前矣亦猶前書事書云

二國已和親兩主驩說寢兵休卒養馬世世昌樂

翕然更始朕甚嘉之聖人者日新改作更始使老

者得息幼者得長各保其首領而終其天年朕與

大書月年卷三十一

單于俱由此道順天恤民世世相傳施之無窮天下莫不咸便漢與匈奴鄰敵之國匈奴處北地寒殺氣早降故詔吏遺單于秣藥金帛綿絮它物歲有數歲予以地寒為辭今天下大安萬民熙熙獨朕與單于為之父母朕追念前事薄物細故謀臣計失皆不足以離昆弟之驩朕聞天不頗亦偏覆也地不偏載朕與單于皆捐細故俱蹈大道墮壞前惡以圖長久使兩國之民若一家子元元萬民下及魚鼈上及飛鳥跂行喙息有口出氣蠕動之類莫不就安利而避危殆故來者不止天之道也

俱去前事朕釋逃虜民謂漢人逃入匈奴及虜去者單于毋言

章尼等匈奴降漢者朕聞古之帝王約分明而不食言

單于留志天下大安和親之後漢過不先不先負約單于其察之

于其察之宋真德秀曰按此書皆大哉王者之言非後世所及也

草優答北單于書 漢班彪

光武時匈奴分為南北單于南單于內附詔徙居西河使將擁護之北單于惶恐建武二十七年遣使求和親二十八年復遣使詣闕貢馬及裘更乞和親帝下三府議酬答之宜司徒掾班彪奏曰今北匈奴見南單于來附懼謀其國故數乞和親然今既未獲助南則亦不宜絕北可明如曉告以前世呼韓那郅支行事報答之辭令必
有適今方
草并上

單于不忘漢恩追念先祖舊約欲脩和親以輔身
安國計議甚高為單于嘉之往者匈奴數有乖亂
呼韓邳支自相讎隙並蒙孝宣皇帝垂恩救護故
各遣侍子稱藩保塞其後邳支忿戾自絕皇澤而
呼韓附親忠孝彌著及漢滅邳支元帝時遂保國傳
嗣子孫相繼今南單于攜眾南向款塞歸命自以
呼韓嫡長次第當立而侵奪失職猜疑相背數請
兵將歸埽北庭策謀紛紜無所不至惟念斯言不
可獨聽又以北單于比年貢獻欲脩和親故拒而
未許將以成單于忠孝之義漢秉威信總率萬國

日月所照皆為臣妾殊俗百蠻義無親踈服順者
褒賞畔逆者誅罰善惡之效呼韓邳支是也今單
于欲脩和親款誠已達何嫌而欲率西域諸國俱
來獻見西域國屬匈奴與屬漢何異單于數連兵
亂國內虛耗貢物裁纒以通禮何必獻馬裘今齎
雜繒五百匹弓韃韞丸一矢四發四矢發遣當行遺
單于又賜獻馬左骨都侯右谷蠡音鹿王雜繒各
四百匹斬馬劍各一單于前言先帝時所賜呼韓
邪等瑟空侯與空侯同皆敗願復裁賜念單于國尚未
安方厲武節以戰攻為務等瑟之用不如良弓利

多骨已美卷三十一
四十五
以聞帝悉納從之
劔故未以齎朕不愛小物於單于便宜所欲遣驛

賜高麗王建武書

唐高祖

武德中高麗屢遣使朝貢高祖感隋末戰士多陷其地乃賜建武書曰

朕恭膺寶命君臨率土祇順三靈綏柔萬國普天之下情均撫字日月所照咸使乂安王既統攝遼左世居藩服思稟正朔遠尋職貢故遣使者跋涉山川申布誠懇朕甚嘉焉方今六合寧宴四海清平王帛既通道路無壅方申輯睦永敦聘好各保疆場豈非盛美但隋氏季年連兵構難攻戰之所

各失其民遂使骨肉乖離室家分析多歷年歲怨曠不申今二國通和義無阻異在此所有高麗人等已令追括尋即遣送彼處有此國人者王可放還務盡撫育之方共弘仁恕之道於是建武悉搜括華人以禮賔送前後至者萬數高祖大喜

與回紇可汗書

唐陸贄

皇帝敬問可汗弟兩國和好積有歲年申之以婚姻約之以兄弟誠信至重情義至深頃因賊臣背恩構成嫌豐天不長惡尋已誅夷使我兄弟恩好如舊周皓及踏本啜黑達于等至得弟來書省覽

久之良以爲慰弟天資雄傑智識通明親仁善隣
敦信明義罷戰爭之患弘禮讓之風保合太和用
寧區宇維茲盛美何以加焉朕之素懷與弟協契
爲君之道本務愛人同日月之照臨體天地之覆
育其於廣被彼此何殊况累代以來繼敦姻戚與
弟俱承先業所宜遵奉令圖自茲以還情契彌固
垂之百代永遠無窮緬想至誠當同此意所附踏
本娶奏請降公主姻不失舊頗恊通規待弟表到
即依所請宣示百寮擇日發遣緣諸軍兵馬收京
破賊頻立功勲賞給數多府藏虛竭其馬價物且

付十二萬疋至來年三月更發遣一般餘並續續
支付弟宜悉也安西北庭使人入奏並却歸本道
至彼宜差人送過令其速達弟所寄馬並到深愧
厚意

皇帝賀契丹皇帝正旦書

宋歐陽脩

正月一日伯大宋皇帝致書于姪大契丹聖文神
武睿孝皇帝闕下玉曆正時布王春而茲始寶鄰
敦契講信聘以交脩方履新陽益綏多福其於祝
詠罔罄敷言今差朝散大夫守太常少卿上騎都

尉渤海縣開國男食邑三百戶賜紫金魚袋吳中
復供備庫使銀青榮祿大夫檢校太子賓客兼御
史大夫騎都尉廣平縣開國男食邑三百戶宋孟
孫充正旦國信使副有少禮物具諸別幅專奉書
陳賀不宣白

皇帝回契丹皇帝賀正旦書

宋歐陽脩

正月日伯大宋皇帝致書于姪大契丹聖文神武
睿孝皇帝闕下歲端更始順陽律以布和信聘時
脩講隣歡而增固閱書言之勤好加篚幣之腆豐

感戢所深述宣罔旣今懷化軍節度使耶律淑等
回專奉書陳謝不宣白

皇帝回契丹皇帝達皇太后賀正旦書

宋歐陽脩

正月日伯大宋皇帝致書于姪大契丹聖文神武
睿孝皇帝闕下玉曆頒時寶隣交聘兼馳使驛別
枉信函載傳慈懿之言益固講脩之好顯希侍次
達此悰誠今歸德軍節度使耶律思寧等回專奉
書陳謝不宣白

皇帝回契丹皇帝達皇太后賀乾元節書

宋歐陽脩

四月日伯大宋皇帝致書于姪大契丹聖文神武
睿孝皇帝闕下壽節屆期隣歡悖契仍導柔慈之
旨過申延祝之言兼厚物容用增刻著顓希侍次
達此悰誠今左監門衛上將軍耶律侶等回專奉
書陳謝不宣白

皇帝回契丹皇帝告哀書

宋歐陽脩

九月日伯大宋皇帝致書于姪大契丹皇帝闕下
狂使輶遽馳國訃不意凶變文成皇帝上仙載

念久敦世好方睦隣歡聞問震驚撫懷感惻姪皇
帝始茲纘紹深極哀摧冀節至情以遵典禮已差
人使專持慰禮今右宣徽使忠順軍節度使左金
吾衛上將軍耶律元亨回奉書陳謝不宣白
皇帝回契丹皇帝回謝書

宋歐陽脩

三月日伯大宋皇帝致書于姪大契丹皇帝闕下
頃承哀訃嘗遣使輶維久睦於仁隣俾往伸於賻
襚復蒙惠問仍示腆儀方此春和克支福履其爲
慰浣奚旣名言今順義軍節度使左監門衛上將

軍蕭佶等回專奉書陳謝不宣白

誓

按誓者誓眾之詞也蔡沈云戒也軍旅曰誓古
三有誓師之詞如書稱禹征有苗誓于師以及甘
誓湯誓泰誓牧誓費誓是也又有誓告羣臣之
詞如書秦誓是也後世雖無秦誓之類而誓師
之詞亦不多見豈非放失之故歟今存一首聊
備其體云爾又約信亦稱誓則別附於盟焉
移京西戎兵備關東誓文

唐德宗

初李正己李寶臣田承嗣梁崇義各擅土
自專德宗即位嚴察神斷四盜俱不自安
時或傳說飛語云帝欲東封汴州奏以城
隘狹增築城郭李正己聞之移兵萬人屯
于曹州田悅亦加兵河上河南大擾羽書
警急乃詔移京西戎兵萬人以備關
東帝御望春樓親
誓師以遣之曰

嗚呼東鄙之警事非獲已惟爾將校羣士各以忠
節勤於王家南赴蜀門西定涇壘甲冑不解瘡痍
未平今載用爾分鎮于周鄭之郊敬聽明命夫王
者之師有征無戰稽諸理道用正邦國宜勵乃戈
甲保固城池以德和人以義制事將備其侵軼不
用越境攻取戢而後動可謂正矣今外夷來庭方

春生植品物資始農桑是時俾爾將士暴露中野
我心痛悼鬱如焚灼嗟爾有衆其悉予懷士卒多泣下

按劉良云令即命也七國之時並稱曰令秦法
皇后太子稱令至漢王有赦天下令淮南王有
謝羣公令則諸侯王皆得稱令矣意其文與制
詔無大異特避天子而別其名耳然考文選有
梁任昉宣德皇后令一首而其詞華靡不可法
式其餘諸集亦不多見今取載于史者采而錄
之

五江王涵為皇帝

是為文宗
更名昂 令

唐郭太后

太行皇帝

敬宗

睿哲多能對越天命宜荷九廟之重

永享億年之祚豈謂姦妖竊發矯專神器蠱惑中

外扇誘羣情駭動神人豐深梟獍咨爾江王聰哲

精粹清明在躬智筭機閑玄謀雷發躬率義勇大

清醜類允膺當璧之符爰攄枕戈之憤既殲巨逆

當享豐福是命爾陟于元后宜令司空平章事晉

國公度

姓裴

奉冊即皇帝位

右冊立

赦天下令

漢高帝

兵不得休八年萬民與苦甚今天下事畢其赦天
下殊死已下宋真德秀曰此令才數語而事理曲盡可以見漢世簡嚴之體是時方平
項羽尚未即位故不言詔然此令在五年而二年乃有伺察詔蓋史臣追書之耳○右赦宥

求賢令

魏曹操

自古受命及中興之君曷嘗不得賢人君子與之
共治天下者乎及其得賢也曾不出閭巷豈幸相
遇哉上之人不求之耳今天下尚未定此特求賢
之急時也孟公綽為趙魏老則優不可以為滕薛
大夫若必廉士而後可用則齊桓其何以霸世今
天下得無有被褐懷玉而釣於渭濱者乎又得無

有盜嫂受金而未遇無知魏姓者乎二三子其佐我
明揚仄陋維才是舉吾得而用之右求才

求諫令

魏曹操

夫治世御衆建立輔弼誠在面從詩稱聽用我謀
庶無大悔斯實君臣懇懇之求也吾充重任每懼
失中頻年以來不聞嘉謀豈吾開延不勤之咎邪
自今以後諸掾屬治中別駕常以月旦各名其失
吾將覽焉

求言令

魏文帝

時帝為丞相魏王

軒轅有明臺之議放勳有衢室之問皆所以廣詢於下也百官有司其務以職盡規諫將率帥陳軍法朝士明制度牧守申政事縉紳考六藝吾將兼覽焉以上求言

分諸將掾屬租令 魏曹操

昔趙奢竇嬰之為將也受賜千金一朝之故能濟成大功永世流聲吾讀其文未嘗不慕其為人

也與諸將士大夫共從戎事幸賴賢人不愛其謀羣士不遺其力是以夷險平亂而吾得竊大賞戶邑三萬追思竇嬰散金之義今分所受租與諸將

掾屬及故戍於陳蔡者庶以疇谷衆勞不擅大惠也宜差死事之孤以租穀及之若年殷用足租奉

讀曰畢入將大與衆人悉共饗之右預賜○按曹氏父子篡逆之人其言本不足取然此數令頗有可觀自不當以人廢言也

黃初文帝六年令 魏曹植

身輕於鴻毛而謗重於泰山賴蒙帝王天地之仁

違百師當作之典議舍三千五刑之屬之首戾反我舊

居襲我初服雲雨之施焉有量哉孤以何功而納

斯貺富而不恡寵至不驕者則周公其人也孤小

人爾身更以榮為戚何者將恐簡易之尤出於細

微脫爾之愆一朝復露也故欲脩吾往業守吾初志欲使皇帝恩在摩天使孤心常存此地將以全陛下厚德究孤犬馬之年此難能也然固欲行衆之難詩曰德輶如毛鮮克舉之此之謂也右自訟教

按劉勰云教者效也言出而民效也李周翰云教示於人也秦法王侯稱教而漢時大臣亦得用之若京兆尹王尊出教告屬縣是也故陳繹曾以爲大臣告衆之辭今考諸集亦不多見聊取數首列于篇

蕭驃騎鸞發徐州三五教

梁江淹

州府紀綱沈攸之背慢靈極稽誅之日久矣况稱兵江漢之上圖彙廟闕之下惡熾罪盈民靈所絕朝廷以剋辰纂嚴令輿夙駕吾任先責遠義兼常慨挺丹投袂信見其時方當水斬龍蛟陸斷犀兕雖烈士銜志壯夫投槩然雲羅旣舒宜廣威防所統郡縣便普三二咸依舊格以赴戎麾主者飛火施行

與李豐教

漢諸葛亮

吾與君父豐父嚴子戮力以獎王一作漢室此神明

所聞非但人知之也表都護平典漢中委君於東

關者不與人議也謂至心感動終始可保何圖中

乖乎昔楚卿屢絀亦乃克復思道則福應自然之

數也願寬慰都護時平已廢為民勤追前闕今雖解任形

業失故奴婢賓客百數十人君以中郎參軍居府

方之氣類猶為上家若都護思負一意君與公琰

蔣琬推心從事者否可復通逝可復還也詳思斯

戒明吾用心臨書長歎涕泣而已

與羣下教

魏司馬芝

善君能設教不能使吏必不犯也吏能犯教而不

能使君必不聞也夫設教而犯君之劣也犯教而

聞吏之禍也君劣於上吏禍於下此政事所以不

理也可不各勉之哉於是下吏莫不自勵以上戒約

下郡國辟士教

晉唐彬

此州名都士人林藪處士皇甫申叔嚴舒龍姜茂

時梁子遠等並志節清妙履行高潔踐境望風虛

心饑渴思加延致待以不臣之典幅巾相見論道

而已豈以吏職屈染高規郡國備禮發遣以副於

烏邑之望音右求

與羣下教二首

漢諸葛亮

夫叅署者集衆思廣忠益也若遠小嫌難相違覆
曠闕損矣違覆而得中猶棄敝蹻履也而獲珠玉然
人心苦不能盡唯徐元直名庶處茲不惑又董幼宰
名和叅署七年事有不至至于十及來相啓告苟能
慕元直之什一幼宰之殷勤有忠於國則亮可少
過矣

昔初交州平

崔姓

屢聞得失後交元直勤見啓誨前

叅事於幼宰每言則盡後從事於偉度胡濟數有諫
止雖姿性鄙暗不能悉納然與此四子終始好合

亦足以明其不疑於直言也

下豫州鎮教二首

晉王沈

其一

自古賢聖樂聞誹謗之言聽輿人之論芻蕘有可
錄之事負薪有廊廟之語故也自至鎮日未聞逆
耳之言豈未明虚心故令言者有疑其宣下屬城
及士庶若能舉遺逸於林藪黜姦佞於州國陳長
吏之可否說百姓之所患興利除害損益昭然者
給穀五百斛若逕一至之言說刺史得失朝政寬
猛令剛柔得適者給穀千斛謂余不信明如皎日

其二沈既下前教主簿陳欽等曰奉省教

之人將慕利而妄舉於是沈又云教曰

夫德薄而位厚功輕而祿重貪夫之所徇高士之所不處也若陳至言於刺史興益於本州達幽隱之賢去祝鮀之佞立德於上受分於下斯乃君子之操何不言之有直言至理忠也惠加一州仁也功成辭賞廉也兼斯而行仁智之事何故懷其道而迷其國哉以上求言

為宋公

劉裕

脩楚元王墓教

元王名交漢高祖異母弟墓在彭城

宋公其後也

晉傅亮

綱紀

主簿也教皆主簿宣行故先呼之

夫寢賢崇德千載彌光尊

本敬始義隆自遠楚元王積仁基德啓藩斯境彭指

城素風道業作範後昆本支之祚實隆鄙宗遺芳

餘烈奮乎百世而立封翳然墳塋莫翦感遠存往

慨然永懷夫愛人懷樹甘棠且猶勿翦追甄墟墓

信陵尚或不泯

漢詔魏信陵君况瓜瓞所興開源無忌守冢五家

自本者平可蠲復近墓五家長給灑掃便可施行

為宋公脩張良廟教

晉傅亮

綱紀夫盛德不泯義存祀典微管之歎

微管仲撫事

彌深張子房道亞黃中照隣殆庶

子房之明隣於顏子之殆庶幾

也風雲玄一作言感蔚為帝師夷項定漢大拯橫流

一本此句在夷固已參軌伊望伊尹呂望冠德如仁指

仲若乃神交圯上道契商洛指四顯晦一作之間

一作窈然難究淵流浩漭淵一作莫測其端矣塗次

舊沛佇駕留城靈廟荒頓遺像陳昧撫跡懷人永

歎寔深一作慨過大梁者或佇想於夷門太史公

游九原者亦流連於隨會趙文子思隨擬之若人

亦足以云可改構棟宇一作榱脩飾丹青蘋繁行潦

也水以時政薦抒懷古之情存不刊之烈士者施行

按此篇微管之歎照隣殆庶二語大戾於古文此

對偶聲律拘泥之弊也然以此類文少故姑取之

脩墳廟以上

文體明辯卷之二十一

